

四庫全書

集部

欽定四庫全書

集部

恥堂存稿卷五

詳校官起居注主事臣顧宗泰

主事臣呂雲棟覆勘

謄錄監生臣董誠

欽定四庫全書

耻堂存稿卷五

宋 高斯得 撰

書事

書咸淳五年事

咸淳五年夏四月平章軍國事賈似道抗章請去其辭
有曰壬辰之吉陛下集英宴羣臣奏事內幄首蒙清問
天顏愀然繼以號慟甚而施非所當施之禮使臣震灼
俯伏無地自容廷瞻為駭謂何為至此極也先是似道

因辭兩宮聖節之賜微寓去意以要人主故上於內宴
之日慟哭而留之已而宰執侍從臺諫卿監以下皆拜
疏請留二相之疏有云書曰監我士師工誕保文武受
民亂為四輔是成王亦以羣臣之留留周公也侍從之
疏有云上而二揆下而百司庶府又下而戴紱垂纓之
士舉三軍萬姓下至閭巷小夫窶人童兒孺子疾首感
頻不謀同辭惟恐師相之一日而去此位也臺諫之疏
有曰豈特陛下願其留二相願其留羣工百執願其留

至於六軍萬姓莫不願留則留者人心之所同然也斯得覽之至此愴然而痛曰嗟乎此漢庭羣臣頌莽功德之氣象也曷為見於盛世哉莽之辭封也前後上書者四十八萬七千五百七十二人及諸侯王公列侯宗室見者皆叩頭言宜亟加賞於安漢公史詳書之所以為世戒也今章鑑翁合之徒無所忌憚如此雜諸莽傳誰能辨之成王之留周公也以叔父之尊泊然無欲故舉天下以付之而不疑監我士師工云者欲周公之留使

百官有所監觀以取法耳豈以羣臣之留留周公之謂乎大聖人之事而使後世戚里之家貪私之人得以藉口其徒又鑿聖經以蓋其附下之失書之史策寧不貽笑萬世乎且昔之奸臣若崇觀之京紹興之檜嘉定之彌遠未嘗不貪權位也然安其為奸邪而不敢求名似道則不然每二三歲必一求去內以要君外邀名譽每一求去披猖矯飾使上下皇擾久而後定甚至使人主倉皇迫遽匍匐慟哭不知貪嗜權勢聚斂積實仇視正

人畏惡偏已惟恐一朝奪其腐鼠如是而言去人之視
已如見其肺肝而可欺乎似道每謂人曰已未之冬事
已去矣至于今日皆我力也故跋扈恣睢無所不至而
其徒黃萬石輩亦曰今日之天下賈氏再造之功也安
得不從其欲安得輕使之去萬口一談牢不可破昔劉
裕之篡晉也晉帝謂左右曰桓玄之時天命已改重為劉
公所延將二十載今日之事本所甘心似道恃功之心
安知不若是也善乎程頤之言也人臣之道由其位而

能為者皆所當為也豈得挾此驕主謂相位為已物乎
況已未之事人皆謂蜀將王堅之功彼方竄伏草間率
兵自退適會其成功焉爾或曰似道雖奸凶然粗習疆
事且能力制人主之欲不可無也斯得以為不然似道
之進雖以邊為援然實無所能日者敵犯東淮大掠而
去能發一矢以却其師乎方城漢水斷我荆襄能出一
兵以隳其城乎孟子曰惟大人為能格君心之非詩曰
德輶如毛民鮮克舉之我儀圖之維仲山甫舉之袞職

有闕維仲山甫補之格非之事非大人不能仲山甫能
自舉其德故可以補人君之闕豈有一饕餮淫穢之夫
而能以道制人主之欲乎嗚呼京之奸陳瓘柱之檜之
兇胡銓折之彌遠之專真德秀魏了翁排之堂堂天朝
無一人發似道之奸詐方且相與仇仇執之使遂其所
大欲而後已志士仁人雖有繞朝之策亦安所施悲夫
賈似道大逆不道留夢炎擬旨取問事

賈似道既竄嶺表有司簿錄其家紹興守臣索得四時

御衣玉璽玉帶及與臣陳奕呂文煥劉整等交通蠟書凡百餘項具以聞給事中黃鏞等奏似道大逆不道乞命有司即訊明正典刑三子三孫依律定罪詔將作監簿周柳取問具奏孤臣高斯得聞之仰天慟哭而言曰嗚呼痛哉此何等罪名不窮治而但取問也太皇太后處於深宮之中不肯與羣臣相接故中外之情不通而留夢炎得憑謝堂為奸擬旨取問而致此大誤也春秋之義人臣無將將而誅之將者有邪謀而未發之謂漢

書黥布謀反有端發兵加誅端者有端倪而未嘗之謂
今反具彰彰如此豈但將與有端而已哉乃不行給舍
即訊明正典刑之請問之夢炎敢於不恤物議不顧國
法如此春秋見賊不討是謂賊黨義戈所指夢炎無辭
於誅矣似道柄國十五年濁亂天下兆釁起禍當斥而
不斥總戎遇敵不戰潰師欲以傾覆宗社當誅而不誅
今復大逆不道欲覆趙氏之宗絕趙氏之祀當族而不
族自非母后幼主之世奸人當國何失刑至是嗚呼痛

哉嗚呼痛哉

書留夢炎見逐本末

先是五月二十八日命將出師而無督將予以問陳王
二相陳揆云連日正與左相議此事今耻堂得我心之
同然深用敬服恐無出留中齋下此則難其人及夢炎
自長沙至予以聞於二相者問夢炎二相嘗及此乎夢
炎曰屢及之豈惟二相太皇太后因賜詔亦屢及之已
而久不出命夢炎尋為右相予上疏引紹興故事乞催

右相出視師不報越三日再上疏趣之夢炎大恨有見
逐意然未有以發也會新豸紹興俞晰上疏劾謝堂等
九人論十五事頗侵陳相而京學生劉九皋等上書攻
陳相事辭多與晰合陳相上疏自辨而去夢炎遂駁新
豸之疏所論皆不行薄暮內批王爚罷平章軍國重事
高斯得依舊職予祠俞晰大理少卿晰搖陳相而予兩
疏留之事正相反夢炎乘間以予雜會稽黨中為若以
黨王爚得罪欲以欺不知者其姦險如此故具識之

題跋

跋馮侍中拯所得真宗皇帝御製

國家當祥符天禧間方隅晏清海內殷富宜有遊豫之事然真廟元夕御製所歌詠者民熙時泰率土多歡藹然樂以天下之意與豐亨豫大者異矣嗚呼此季世也緬想祖宗盛際如四時之春其猶可得見乎

跋趙適所受徽宗皇帝御筆

延康殿學士趙適行事班班載於國史適嘗兩帥真定

其始帥也奏不可輕信童貫規取全燕以開邊隙其再帥也奏不可謂敵人不知存亡遽增邊戍以兆釁端二奏皆懇切有忠君憂國之誠獨所謂諫伐遼之疏載於北盟編者則未見豈太史氏網羅放失有未至乎政和間童貫謀北伐諸路已調兵矣會陶悅使敵還言敵未有釁徽廟乃詔沿邊償那軍兵上邊防托指揮更不施行今閱適所受御筆即此時所降也適在真定時北事有萌而未盛適去事始大熾嗚呼使當時受任之臣皆

如適之老成持重不徇姦臣中天之禍豈至此哉景定四年秋九月前史官臣高斯得拜手謹書

跋黃給事鈞所藏孝宗皇帝御製

臣嘗伏讀國史乾道四年二月庚子孝宗皇帝出御製春賦以示大臣言農事方興要使無失其時蓋與七月之詩相為表裏今觀賜臣鈞等苑中即事詩感念春和有與民同樂之句其月庚戌也上距春賦之出十日而近是時講解初定域中晏然時和歲豐百姓安樂而孝

皇留意民事如此其後乾淳二十年間阜康之美比迹
成康猗歟盛哉後七十有九年歲在壬子十有二月前
史官臣高斯得拜手謹書

跋范文正公帖

近世士大夫以覓舉為常同氣之間有一顯者則為其
弟兄請寄營畫不得止文正范公遺其兄書既以舉
主為問矣乃以防微謹末不必預圖勉之文正之愛其
兄亦異乎世俗之愛其兄矣烏乎是不足以觀世道乎

跋朱文公與劉靜春帖

原註專言戊申去國之事

嗚呼先生古之大人也而林栗詆其傲慢沈繼祖斥其
不孝千載之下將惟先生之信抑二僉人之信乎斯得
之愚於先生相萬也戊申按吏浙東或者謬稱其似乃
今蕭泰來以倨傲不孝見劾復與先生同寧得不荷之
以為榮乎三復遺帖慨然以歎因拜手書于其後

跋南軒所書愉色堂

南軒先生名零陵唐氏之堂曰愉色其孫亮徵予言發

其義予謂聖賢之言事親類徵于色曰色難曰下氣怡色曰愉色婉容夫外不足以信內于色乎何取譬之木焉愛其根也色其華也木之根深固其韡韡之象發見于外者詎可遏乎故愛親之深者色不期愉而自愉否則雖勉強致飾其誠中形外有不得而揜矣然則為人子者欲學閔曾盍想見其形容而用力焉

跋南軒永州諸詩

杜子美詩自二十一歲以後韓退之二十五歲以後歐

陽永叔蘇子瞻二十六歲以後皆載集中至今讀者誰
敢以少作少之惟劉禹錫編柳子厚詩斷自永州以後
少作不錄一篇故柳詩比韓歐蘇詩少而加嚴南軒先
生永州所題三亭陸山諸詩時方二十餘歲興寄已落
落穆穆如此然求之集中則咸無焉豈編次者以柳集
之法裁之乎崑采夜光要為可寶唐君其謹藏之

跋趙忠簡公詩帖

中興宰相雖多名相忠定李公忠肅范公忠簡趙公忠

獻張公四人而已世惟見其勲德焜耀不可企及而不
知文章餘事亦皆絕人忠定鉅集盛行於世有不待論
忠肅當靖康建炎間有詩云四海已無容足地百年空
抱濟時心當時誦之忠獻清音堂詩其傳尤廣斯得曩
從二公子孫獲觀手迹獨忠簡所著未之見也今乃於
其曾孫仁和宰壁得五詩讀之益以慨然雖然見乎事
見乎辭非有二致欲觀數公勲業誦其詩則知之矣

跋胡謫七思詩

鶴山先生嘗言國朝名公鉅儒有不必皆自科舉而由學校進者絕鮮其敝務以科舉組綴之文糜爛士氣揣摩迎合之說極喪心術予昔著籍其間而知信然大率蔡京太學之法害之士由之而不知耳胡君去太學二十年猶不已于思懷君養之仁念羣居之樂則可矣若曰成才乎是而不忘其本則吾不知也觀者毋以反騷諂之

跋鶴山送魏顯道西歸詩

表兄魏顯道寶慶間省鶴山於靖州其歸也鶴山賦詩
六章送之大率勉以問學紹定間斯得亦往省臨去贈
言有無限工夫歸語爾之句與誨顯道盖一意也蘇文
忠在黃岡兄子安節省之其歸也送以十四詩不過勞
其遠來屬之家事而已鶴山獨勉勵後進如此循誘之
心今猶可識也撫卷為之三嘆

跋郭鎰所藏二父帖

先生與沈黎叔父後先入四川制幕與章贛郭君鎰為

僚今五十年矣而書尺宛然予時為益昌掾吏楷一牘亦繫予後嗚呼何好事如此哉使子弟才識下則覆轡甌久矣郭君外孫衡山尉趙若株不遠二千里特以求識讀之慨然書其末而歸之

題池氏所藏四君子帖

原註朱文公呂大愚項平庵袁絮齋

熟觀四君子之帖其於池君聖夫切而磋之至矣而朱文公之訓尤凜乎其可畏焉昔之所謂師友者蓋如此池君既衣德言以就德性復寶是帖以紹子孫則其篤

信好學之誠亦可尚矣嗚呼狹隘而不能恢廣昏陋而無所發明朱門高第猶有此病而況吾儕當今之世猶有能訂而砭之者乎否也

題常氏家傳後

本朝大姦元惡孰有出於京檜者敏節公父子後先排擊不遺餘力竟遭廢絀流落以死而中執法身後子孫幾得奇禍自當時觀之阨窮甚矣然一門大節載在青史與日月爭光至今讀之使人凜凜有生氣然則小人

盡力排君子無能為損祇增其光耀而已中執法之曾
孫棐撫信史誌狀諸公之文作為家乘則知常氏世德
遠有源流至敏節公父子而始大棐屬予書其後伏讀
歎息之餘拜手以識太史公曰詩有之高山仰止景行
行止雖不能至然心鄉往之嗚呼吾儕可不務乎

題姚氏觀敬亭記後

古者墓藏廟祭所以辨陰陽形氣之分不可亂也周官
祭墓為尸蓋非墓祭故余於姚氏墓亭之扁竊有疑焉

雖然孝子之敬其親無死生朝暮之間也一出言一舉足敬無不在豈必祭而後可以觀之哉名亭之義儻以是引而伸之庶乎其可

題建安李演風露吟小稿

甚矣詩之難也嚴而不峭平而不俚清而不泊幽而不昧乃可以言詩今之為之者不然險澀以為嚴凡近以為平寒苦以為清黯黯以為幽李君之詩庶乎無四病矣予讀之盡編意欣欣焉抑礪諸錯諸使圓美流轉如

彈丸則無以加矣書其後而歸之

題長興李王顯應集序

前牒所志結草亢回為厲殺賊之事皆酬恩報德而然
王年十七去浙度淮遇疾而死乃為明神廟食其地國
有疆事輒輝威靈其跡顯著朝廷嘉之封以王爵先儒
所謂無所為而為之者茲其是與予過江陰之青陽王
裔孫辰一家焉一方敬之見輒衆手加額其遺風餘烈
尚若此辰一求識王遺事因書其後

題李振介軒

世之論介者大率以為堅彊孤峭人所難能之行不知義理至於確然而不可易者即介也何難能之有人為私欲所屈外物所移往往失其常守而以申徒狄屈大夫之倫為不可幾及亦自待之涼矣予同年生李君振仕閩中遇事不可回奪庸齋趙公以介名其軒求予發其義予謂之曰子學易乎豫介于石獨於六二言之夫六二中正之爻也然則介非堅彊孤峭而為義理之當然

詎不信乎子循理而行毋違中正介在其中矣李君曰
善為我書之吾將從事焉

書欽承天閑道錄後

異端之害橫流于天下總其要歸兩端而已智者惑其
說愚者沐其利沐其利者其害淺惑其說者其害深沐
其利者非惟不可救亦不足救也聖賢所為被髮纓冠
辭而闢之者此而已矣然苟無其本徒呶呶以譟之則
反為所賤是擅之勢而助之攻也且彼方挾近似于吾

者以為重銜吾之所不如者以為高吾能辨其所以異者以折之勉其所如者以勝之彼猶未肯厥角稽首也而以口舌爭之則可乎嗚呼道喪有間矣其軼于他說者鮮不溺焉欽君獨能集儒先之說以閑之其志亦勤矣然吾謂當以申公武帝者為本而以是編羽翼之其庶幾乎

跋李秀巖先生學易編誦詩訓

秀巖先生近世大儒也世徒見其論著藏於明堂石室

金匱玉版遂以良史目之不知先生中年以後窮極道
奧經術之邃有非近世學士大夫所能及者又其天質
彊敏絕人三禮辯二十餘萬言二百日而成學易編二
百八十日而成誦詩訓亦踰年而成考訂鄭王孔賈之
謬折中張程呂朱之說精切的當有功於學者為多斯
得受業於門每念有以廣其傳者來守桐江首以詩易
二首刻之與同志共其如禮學諸書文字頗多倘未以
罪去當陸續以壽梓云

跋趙和仲

順孫

近思錄精義

聖人之道載於經者浩乎其無涯朱呂二公懼學者不得其門而入也掇周程張子之書要切者錄焉使為求端用力之地故名之曰近思讀者猶以其義奧而難知也復撫朱子語言文字之及乎此者以發明之然或錯以已說或蒐輯未廣不若趙君此編之精而備也朱子嘗言四子六經之階梯近思錄四子之階梯然則是編也又近思錄之階梯乎雖然書之備固學者之幸亦學

者之甚不幸也天下至蹟之理不待研究開卷得之其肯復加沈潛之功乎程子曰信有二有信人者有自信者信人者未必真知自信則不可奪嗚呼旨哉言也吾儕可不勉乎故善學者必先竭吾心思深探力索待其躍如乃以先儒之言決之庶乎其有得也

性理蒙求跋

大學中庸語孟諸書先儒之說甚備朱子後出從而折中平實精深毫髮無遺恨矣獨患學者不能謹守而務

為新巧以鑿之黎晉甫作性理蒙求出入朱子之書無一字不據依可謂篤信好學者後生得之習其文義塗轍不差由是以讀聖人之書可無穿鑿駁雜之病矣易曰蒙亨以亨行時中也蒙有可亨之理教者以亨道行之在當其可而已予謂是書施於十五志學之時為宜不然則躡等而瀆蒙矣

跋南軒雙鳳亭記

烏虜先生聞道之早如此作是記時年甫弱冠其論文

已謂非特言語之工誦讀之博而已其本不過於治身其極可施用於天下此之謂至文雖晚年義精仁熟之言何以過此詩云民之靡盬誰夙知而莫成其先生之謂歟

鄧中丞家集跋

秀巖先生李公朝野雜記載嘉泰二年言者論近歲習偽之徒唱為攻偽之說今陰陽已分真偽已定人之趨向已正望播告中外專事忠恪奏可其年二月朔遂復

趙忠定公資政殿學士徐子宜劉德修陳君舉章茂獻
薛象先樂正則曾無逸項平甫范文州黃商伯之流咸
先後復官自便或典州宮觀又削薦牘中不係偽學一
節俾勿復有言時朱文公沒已踰年周益公留衛公皆
已秩貶還政冬十月詔文公以次對致仕閏十二月制
復益公少傅衛公少保自是偽禁稍稍解矣予始讀之
甚偉言者是舉以為機括轉移之間邪說遂止善者獲
伸國脉道命至於今是賴記不表出其人為深可惜及

來湘中得觀中丞鄧公家集則知此疏乃公為察官時所奏也彭忠肅公與公往來之書稱其正論侃侃扶持善類於荆榛摧折之餘又深歎其措意懇惻委蛇曲折之為不易惜乎公以謫死斯事世鮮知之比年寧錄登進之時秀巖與予先後去國不知後來秉筆者果能搜羅而紀載乎否也予方被命還朝會當告之秉筆者庶幾補太史氏之闕云

跋趙文定公君錫行實

元祐人雖不一槩其行事亦各不同然後世望其姓名
輒如麟鳳之不可及況中司純孝之行冠冕一世當時
名臣如內翰范公之倫咸所歎息稱道為善有後天之
道也僅一再傳於今為庶且顛連困阨無以自贍嗚呼
豈果菰草木果不可望其哀且仁也邪覽其行事為之
三嘆

跋朱常卿

時敏

奏藁

予昔從太史氏論次中興四朝事見孝宗於羣臣論對

多見施用不為具文嘗因見上舉以為告有曰孝宗每
於臣僚既對次日即命大臣將上隨事商榷而罷行之
又因以識拔人才如王蘭羅點賈光祖樓鑰之流皆由
此擢用卒為名臣願陛下取法以革近年陛下對具文之
弊惜其未之行也今觀少常朱公淳熙間奏對蜀中利
害君臣往復如家人父子然立以其言付二府施行且
留公立朝十年而後去拜觀奏豪歎感無已嗚呼乾淳
之盛其終弗可復見矣夫

跋盧氏友于堂記

西銘之書其仁人孝子之事乎天之生物使之一本末有不實本之病也故天下罷癯殘疾一有不遂於吾之孝猶為未純况吾之真同胞而有不愛乎書云惟孝友于兄弟詩云兄弟既翕和樂且耽子曰父母其順矣乎聖人教孝之端大率由此出門舉足之不謹欲以行遠登高未有能至者也黃山盧君築室于墓名曰友于以志其先人之訓諸賢記而歌之備矣復求予言何以告

之雖然人子之充其孝莫先乎是而非止於是也廬君
懋哉

跋鄒道鄉甘泉銘

此銘之作鄒公井渫不食之時也其曰水不可以終止
王明並受其福之謂也孰知其卒不食以取行惻亦可
悲矣夫雖然是銘歲月予竊有疑焉案國史崇寧元年
閏六月蔡京為公偽疏責公衡州別駕永州安置二年
正月除名勒停昭州居住四年九月移漢陽軍則四年

正月公安得在永乎張宣公兄弟不以為疑而識名其
末其又何也唐君更考詳之

跋林逢吉玉溪續草

劉夢得定柳州詩斷自永州以後惟晏元獻家本存省
試詩一首人不以為允也柳州之詩孤峭嚴健無可揀
擇其以此乎林逢吉以詩名一日示予續草一編曰吾
舊所為三集已別行此近作也願得一言識之余退食
閱之名章俊語頗多三集雖未見必也斯為至矣雖然

逢吉老益喜吟續藁之後攷其年數未脫藁者尚多尤
余所欲見也而逢吉未肯輕出何邪然則讀永州以後
之詩請俟他日

跋劉直孺拙逸軒記

鶴山嘗云拙非聖賢所取周子疾巧之害道故為是矯
世之論耳雖然即周子之義而推亦有可言者蓋拙有
真偽周子所取者真也拙外巧中者偽也人知巧者勞
而不知以拙售巧者尤勞何則彼蹈其實而醜其名覆

護掩藏惟恐其敗故神愈敝也吾願直孺務勸其偽而致養其真則得周子之意矣

跋黎晉甫黃巖縣樓記士人送行詩

黎晉甫之宰黃巖也以廉著稱予時丞郡深敬愛之去縣久矣御史陳垓惡其論事觸忤時相託為邑人黎靡有子遺之詩以追誣之余守嚴陵律已自謂無愧去郡久矣御史周坦託為郡人十七字詩以黷貨而追詆二事蓋絕相似使垓坦而端人也則言足取信予與晉甫

將不容於天地之間矣如其公論之所棄也則滓穢加之馨香采烈又何病焉晉甫以清獻杜公之記戴王諸人之詩示余求一言以刷前耻因取余所遭者比而言之庶發觀者之笑云

高李蠲征錄跋

蔡京茶法朝令夕改毒民甚矣然責土產於園戶收引息于商人始終未嘗變也近世貪吏乃敷引園戶索額責償此又京所不為毒民不愈甚乎予昔為川茶司屬

白使者罷之三湖李君澤民監名山場請任其事于是
前弊頓除園民得息後二十年澤民輯當時所行為一
編命曰高李蠲征錄求予一言識其末予謂為政愛人
仕者之常非有異也然出之而無本為之而無其誠未
有能終始惟一者澤民去蜀仕閩孜孜民事盡力為之
海隄之役一邑蒙利雖以是遭讒廢絀曾不怨悔非所
謂終始惟一者乎予故于茶錄之末併識其事以厲同志
書惠厚下艱難錄後

予觀惠君艱難錄宣和間守解州金人圍之城破執以去已而逃歸朝廷以為御營參議官隨軍至淮陽遇敵而潰復率諸將詣行在所雖其受命于危難之際彊弱不敵不能成功而始終一節自歸君父亦可書矣良史因事載之典冊

中興繫年要錄載此事

令後世知其有名宜哉載

覽是編為之三歎

銘

江鎔習齋銘

人之知道由學之故學而不習學則不固生熟之度盍
驗諸心九醞味厚七入色深是以中庸貴乎弗措所謂
知新弗離乎故或繹于中或體于行表裏互發精義入
神顏曾以之優入聖域予何人哉胡不是則

吳巽之友竹齋銘

生天地間性命于氣匪人獨然伊物無二維竹之生受
直于天貫乎四時既勁既堅禮居大端詩美令德一言
蔽之莫尚乎直潛聖論友以直為先吳子友竹吾有取

馬迺貽爾銘揭置座右興卧以之之死母撓

趙彥僉介庵銘

書名之學有會其意維介於文分而為二在人進修是
曰利器以別正邪以判義利由辨之明守則不貳既固
既安于石不啻彼百世師謂和之至而能凜然不可易
志由擇之精知得非義於乎我友斯語之事毋奪爾真
毋昧爾智惠何人哉希之則是

王詠省吾齋銘

大賢省身三事而已至於吾儕又奚止此隨事默察日夜以思約之又約乃至於斯維曾入聖以是為主我友希之請事斯語

宋捷如心堂銘

心涵太虛萬古惟一全體大用存乎神易同人之先中直本同復觀諸咸我感彼通求心之道莫尚比擬以已況人夫豈有異昧者弗察曾不善惟一膜之外癢疴莫知忠中恕如本自蒼頡先覺闡祕精義斯挾宋叟之堂

高叟銘之尚衣斯言終身行之

贊

王司封

溲

真贊

鞠躬履方擇地而行在漢宜鄉今有先生四海符谿先生其甥我瞻儀形鄙倍其萌

趙郊發集孟四箴贊

我讀七篇有見于恥終身行之未測其止趙子作箴其目有四孝敬善利貴賤譽毀浩乎博哉精義妙旨知之

實難行亦匪易維是四者有源有委升高自下適遠從
邇充爾知能擇爾塗軌窮達好惡皆外物耳願循其序
默察真履考致要歸一而已矣我作斯贊曰能則未敢
誦所聞以諗同志

答問

玉堂直日荅問

予所雅言詩書執禮皆雅言也臣恭承聖問臣聞聖人
教人不過日用常行之道所以使學者篤志近思不驚

於高遠不忽於卑近而有陵節躡等之病也雅者雅素之雅謂平日之所以常言也詩以吟咏情性使人有所感發而溫厚和平書以道達政事使人明於治亂而效法監戒禮者天理之節文使人制心檢身止邪防欲者也三者皆至近至切如日用飲食之不可闕故常常言之也於禮獨曰執者蓋詩書言其理而已禮則起居動靜所執守據依者非但空言而已也故曰禮不執則不行三者聖人所常言若夫性與天道則宏遠微妙孔子

未嘗輕以語人且此章與五十學易之章相接亦所以見易道之妙非孔子之所雅言也陛下聖學高明日御經帷儒臣所講誦者莫非聖經賢傳如布帛之文穀粟之味固不患其驚於高遠而溺於凡近矣臣區區愚忠猶願陛下即孔子之所雅言而加聖心焉二南詩之首也驗之於身吾能樂而不淫乎二典書之首也體之於心吾能敬天敬民乎禮記之首曰毋不敬吾能敬以執之宮庭間燕之時亦戰兢自持不至於失墜矣乎夫如

是則孔子之雅言不為空言矣陛下聰明天縱就將之
久孔子之言固已默契允蹈臣不量荒陋冀以塵露增
益萬分惟陛下擇焉

答客問

客有問於高子曰昔揚子雲為官拓落而取嘲於人韓
退之投閑置散而貽笑於士皆為文以解之今子坐廢
八年憔悴頓踣甚於二子無一言自解不已拙乎高子
莞然笑曰若何言之陋二子慕君不得熱中有言世稱

其文之奇予獨憐其志之卑也予為我願之乎自古不
得志者莫若孔孟直道取困死而無悔其言曰天之將
喪斯文也後死者不得與於斯文也曰夫欲平治天下
當今之世舍我其誰也以天自斷而未嘗以說人孔孟
之不師而揚韓之慕若何言之陋也客曰非此之謂也
自東方先生以來文人才士落落於時未有不因筆墨
以自見非特揚韓為然今予不足於文姑自託於聖賢
為大言以欺我高則高矣而終未免於拙之謂也高子

曰嘻客之要我若是予何愛於言然非耻於拙而動於激特欲客知予平生之所遇也自嘉熙以來予用於時者四絀於時者六用我者曰文清李公曰清獻杜公曰丞相吳公曰丞相董公絀我者曰周坦曰蕭泰來曰朱熠曰沈炎曰章鑑曰何夢然十人者其為人賢不肖皆非予所能知也夫用於時則榮絀於時則辱天下之常理也而好事者評予之用舍乃皆以為榮予甚感焉求其說而不得則彊以意揣之曰豈用我者法當惟其人

紕我者法當反其類而今皆應法矣乎夫使用我者而出於開慶之大臣紕我者而出於端平之御史則予之所懼也嗚呼繼自今以往其復有知我如二清吳董之倫矣乎予不得而知也其復有厄我如坦泰之徒矣乎予亦不得而知也使無二清予則已矣若猶有之予雖老矣安知其終不遇哉如之何其勇於自絕而急於自解也中庸曰在下位不援上不怨天不尤人孟子曰行有不得者反求諸己而已矣予將循念往愆益求其所

未至以聽天之所處焉苟徒嗟卑嘆老哀窮慙屈以自見於筆墨之間此特文人所為而非聖賢用舍行藏之大法也予非惟不能亦不暇客矍然曰吾以語言文字望子而子以聖賢所為自期乃今日知所進矣長揖而退

客悼

耻堂居士歸自宣城客有過之者蹙額而言曰子何歸之遽乎吾觀一時人士流落不耦未有若子之甚者也

吾嘗計子之閱閱而知之子之齒于仕版且四十年矣
其在內服起自史館至于大蓬其在外服三東州麾七
乘使傳歷位不為不多也然考其實則內不及五載外
不過六年餘皆授閑置散之時也子於等輩不為後人
曷為至此哉居士笑而應之曰客知其槩未知其詳也
試為客言之始予有位于朝實與樞參季父同時士之
有求於季父者往往津介於予一日有扣門者視之謝
公方叔也時自列院出為湖南賓客意不自得予言之

季父季父未及薦進也俄而自致冠豸矣又一日有扣門者視之趙公與澤也時未脫選予言之季父季父立舉之又一日有徒步衝雨而來者予視之姚公希得也時自秦邸出倅當塗太守鄧泳拒其來予言之季父季父言之時相易倅他郡十餘年予自少蓬得罪去而牟公子才為從官屬士爭出其門一日趙公曰起自淮東遺予書予素才之薦於牟公云此人善議論蜀人在列者莫能及也聞者不說此四公者未遇時予皆推轂焉

今一為王一為相一為執政一建大閫而予猶夫人也
不特此爾淳祐之季年丞相吳公當國一日而除一蓬
四著善類舉手相賀蓋予為少蓬牟公與徐景說李純甫
留漢輔為大小著今自景說物故之外一為執政一為
內相一為侍從而予猶夫人也官竊秘監之稱者十有
五年職竊寶文之稱者亦十有五年予之落拓如此豈
特如客所云而已哉而予之所以至此予自知之客未
必知也昔吾夫子於公冶長南容及史魚蘧伯玉皆比

而言之而辭氣有抑揚其意若曰長之得罪雖非自取要不若南容之免於刑魚之亢直雖曰難能要不若伯玉之為君子然則七公之所以達以履南容伯玉之行予之所以窮以蹈公冶史魚之迹而然也然夫子所貴在彼不在此則優劣豈不較然異哉雖然姑置容冶而以遽史論之夫子所謂卷懷者必其可懷之物也故實可得而懷瑾可得而懷至於矢則豈可懷之哉善乎龜山之說曰史魚之如矢雖欲卷而懷之有不可得也故魚

雖不如伯玉而稟之於天者至死不變聖人猶有取焉
予將挾魚之矢以終吾身窮達得喪何足道哉於是客
赧然慙曰予之志如此吾以常情測之陋矣詹尹漁父
尚不足以知屈原吾安能知子哉乃悵然而去

文

諭俗文

朝廷遣使者觀風一道其責重矣所以別白是非采察
善惡獎厲忠信懲革澆訛耘耰強梗伸達沉滯使聖天

子教化宣明德澤流布光輝燦然著於所部如皇華之
光明于野然後為盡其職豈俗吏所能辦哉使者受命
來使閩中始至嘗下教以為上四州之俗近於狠下四
州之俗近於頑非鄙夷爾民而待之薄也蓋入境以來
所聞則然是以明相告諭庶幾能改今八閱月于此矣
觀之訟牒固可槩見往往父子相殘兄弟相賊夫婦相
棄親戚相仇較錙銖之財而興訟至歷數載因纖芥之
忿而交愬殆偏諸司虛造事端偽立契券欺誣良善瀆

秦公私泯泯焚焚何所不有吁使吾民至此非使者之
罪乎古之良吏不事刑威民服其教至於人人有士君
子之行無他身率以正而已今使者德業無聞行義不
著無以表倡乃欲恃區區政刑以相糾督宜乎習俗之
不厚獄訟之日滋也視周之使臣相去萬萬慙負職業
如此朝廷設以古法繩之不陷大譴矣乎今當春和萬
物更始特述所愧以諭爾民其亦少相體悉各務省循
毋長嚚頑毋作奸偽毋棄禮義毋逆倫理毋事鬪狠毋

恣侵漁使里閭清靜田野安生四方之人將曰閩中陶染諸先儒之風今又服其使者之教如此人之詆其頑狠者妄也夫如是上下豈不並受其福哉使者之言非飾美觀非為迂闊爾民其審聽之毋忽

寧國府勸農文

太守下車兩月有餘風俗猶未周知然大略亦可見矣此邦士饒民頑奸謗喜訟太守欲諭教之以積習久未能也茲歲二月以令勸農乃先進爾農而告之太守蜀

人也起田中知農事為詳試為父老言蜀人治田之事
方春耕作將興父老集子弟而教之曰田事起矣一年
之命繫於此時其毋飲博毋訟詐毋嬉遊毋爭鬪一意
于耕父兄之教既先子弟之聽復謹莫不力布種既畢
四月草生同阡共陌之人通力合作耘而去之置漏以
定其期擊鼓以為之節怠者有罰趨者有賞及至盛夏
烈日如火田水如湯孳耨之苦尤甚農之就功尤力人
事勤盡如此故其熟也常倍及來浙間見浙人治田比

蜀中尤精土膏既發地力有餘深耕熟犁壤細如麴故其種入土堅緻而不踈苗既茂矣大暑之時決去其水使日曝之固其根名曰靠田根既固矣復車水入田名曰還水其勞如此還水之後苗日以盛雖遇旱暵可保無憂其熟也上田一畝收五六石故諺曰蘇湖熟天下足雖其田之膏腴亦由人力之盡也太守始至頗聞而農治田失之鹵莽其始種也耕之不熟地力不盡苗既殖矣不耨不耕稂莠並興陂塘不修圩埂不固旱不知

備滂不知防則又鬪狠嚙訟以賂有司避役頑輸以取
追逮心力既分不得專一是以雖號樂土連歲不登由
此故也父老其歸以太守言諭告子弟川浙與宣風土
雖殊勤則得熟怠則薄收其理一也雖然尚有以告父
老夫水旱雖係天數而感召則在人心若使田里之間
父慈子孝兄友弟恭鄰里輯睦風俗純厚自然可以感
召至和風雨調節災害不生太守得與汝曹共享一飽
為太平民豈不樂哉父老其歸丁寧子弟明聽吾言毋

忽

嚴州勸農文

太守奉詔書撫百姓今一年矣生於蜀土不能詳知汝
州利害然汝州至急之務公私所甚憂者太守雖愚亦
知之矣豈非艱食之為患乎汝州山多田少良田纔百
二三餘皆磽瘠爾農雖盡力以耕及冬歛藏尚不足以
餬口常仰糴他郡一遇閉遏輒有溝壑之憂太守雖大
聲疾呼告于臺閭彼不顧也爾農其可不力耕乎去歲

旱灾太守早夜焦勞蠲租發廩勸富人賑糶白於朝得米萬石以助糶濟自謂心力粗竭然小惠安能徧也今幸陰陽調和臘雪春雨率皆應候天時既順人事可不勉乎太守用出遠郊進父老而告之古語云人情一日不再食則飢飢火所驅不顧廉耻奸邪盜賊皆由此起欲其不飢無他勤於耕而已欲耕之勤去其害於耕者而已汝州之人喜興詞訴在官日多在野日少耕能不廢乎汝州之人喜事鬼神竭力費財奔走道路耕能不


廢乎好飲博則心志荒好嬉遊則本業墮若能去此四害惟專惟勤田之無收吾不信也父老皆深知田者毋謂太守之言常談歸語子孫明聽力行毋忽

福建運司勸農文

舉天下之田皆不可不熟而福建之田尤不可以不熟舉天下之民皆不可使飢而福建之民尤不可以使之飢何則歲歉生事此方為甚故也古人有言飢不得食雖慈母不能保其子然則歲歉生事豈爾民之得已哉

近年以來時和歲豐上下粗給部中無犬吠之警使者
之責亦少寬矣然嗣歲之憂固未艾也今幸陰陽順序
春雨沾足太史所占又主豐登爾農正當上順天心力
修人事使穀之入歲多一歲父母妻子免於飢凍奸邪
賊亂不得竊發上下歡欣相安於無事豈不樂哉使者
又以耕之三害戒汝其審聽之捨本逐末羣聚私販犯
法破家此害耕之大者喜興詞訴伺候官府奔走道路
次之博奕飲酒嬉遊無度四體不勤次之苟能去此三

者父率其子兄勉其弟沾體塗足一以耕種為事天道
神明報應不差不以豐年賜汝使者當任其咎爾農毋
謂常談忽之



耻堂存稿卷五

欽定四庫全書

集部

恥堂存稿卷六

詳校官起居注主事臣顧宗泰

主事臣呂雲棟覆勘

謄錄監生臣王人作

欽定四庫全書

恥堂存稿卷六

宋 高斯得 撰

五言古詩

暮春即事

皇天列四運，懿茲暮春熙。
和風著萬物，觀物令心怡。
如何魏晉後，詞人總淒淒。
退之頗知道，及此尤傷悲。
寧非溝洫留，嘆老還嗟卑。
哀樂緣外感，安能識天時。
不見魯中狂，陶然浴清沂。
問渠樂何事，無言對春暉。
人亡已千

年嘆息將安歸

次韻王秉純投贈三十韻

狂客寫孤憤危詞難羣儉秋蟲露節角春林掃穠纖長
缺剝橫鰐寸鐵剗妖蟾赤子臨橫草蒼生捐蓋苦無衣
可自蔽有突何由黔冽泉浸苞稂白露摧蒼蒹念此心
怛怛因之淚漸漸誰能坐捫舌聊欲一奮髯百憂不易
窮千篇猶未饜生氣凜不憊死灰驚復炎敢云寡鶴唱
尚欲神龍潛拾遺愛薛孟謫仙重王閭相邀共夜話快

讀臨風簷更闌聖頻折樂極酒屢拈國家正閑暇上下
方熙恬賈誼枉流慟桓侯笑鍼砭無庸事吟諷且復披
湘縑緬懷西方美遐想虞庭僉狂愚易構禍譏刺徒招
嫌舌出躬是瘁戲言心如惓且當阮籍醉莫待申屠籍
及今不自悔明神將汝殲之子十步才時命三年淹
原註時方
下江湖久放浪齏鹽應餽端如伏檻虎更似緣竿鮎
匱藏玉有美臺餽金無兼我欲引自近寒盟應重燭弁
山蕨可茹茗溪鯽堪黏諾金雖未墜許劬已可覘從今

但洗耳水程報郵籤

送徐景說歸三衢

秋風吐商氣庭樹憾以飛美人悼時節去意不可羈朋
陰傲排盪晨光弄熹微靈修豈敢怨浩蕩終難依岐分
蹈一失決此存亡機僵株擢新稊倏忽成十圍陽院人
所願蒼天詎能違蹇予於夫子亮節深所希取舍既共
是排根亦同非豈伊桐江上裘回送將歸時危抱深感
人遠傷遐睎國家福未艾祖宗臨孔威願子崇明德桑

榆借光輝

思耕亭有序

吾友王敏道為富陽稅官解近嚴子陵祠築亭其旁求
名於予考諸前牒富陽漢會稽富春縣吳始分富春桐
廬先生耕釣之地皆在富春明矣然今分隸二州則在
嚴者宜以釣為重在杭者當以耕取名紹興間鄭公剛
中宣撫四川作思耕亭蓋以思孔明耕屯為義予蜀人
也習聞其號乃借以名斯亭因繫之詩致懷賢之意云

莘郊投耒興六百奠殷祀南陽輟耒出漢業債還起聖
賢憂世心秋月照寒水彼哉植杖徒長往見何庠我讀
逸民傳初訝子陵志赤符燄方張注想資共理掉頭歸
深山繆洗巢父耳六經凜刀尺云乎不斯畏反覆史氏
詞陵去良有以維人驗進德必於師友試歷試猶夫人
成就安能偉挽士亦既來舍王寧得已漢道汝不衡先
生可輕議釣臺千萬篇未有愜予意賦詩題思耕聊與
發斯義

觴客海棠下以東坡詩紅萼是鄉人之句分韻
予得絲字

南國候傷旱東皇駕如馳月正未強半紅紫皆離披蜀
花異凡品作態能矜持可憐多迫蹙竟隨羣卉移如彼
市門女狼籍施臙脂又如賤錦工忙擲梭中絲匆匆不
耐看欲速將何為碧雞有佳人睡足晨粧遲含姿自愛
惜肯受春風欺思之不可見感事腸生悲

為溫樂堂五綠亭解嘲

園林非不佳名字著難穩稍與流俗異譏呵來嚙嚙我
堂名溫樂竊慕涑水翁我亭名五綠又希午橋公客來
笑不已誚我何其鄙拳拳二相國所愛人爵耳聞之為
一呖爭端自予開嗟予信鄙矣笑客亦愚哉相誠吾所
愛何必裴與馬唐非無李盧宋亦有章蔡爾知相何物
是謂聖賢宅士而不為此何以下膏澤孟軻出畫意宣
尼載質心溫豈獨甘樂裴非錮園林二扁有深意客詎
窺其渙吾言豈狂言刀尺自孔氏

題黃巖蔡氏青在亭

逢人說愛山誰何是真愛苟無丘壑情在眼猶不在君
看終南客豈不卧與對奈何心自盲坐失煙霞態蔡侯
故靜者肯與青山背作堂老其間列岫儼襟帶蘿月散
庭隅白雲屯戶外疏櫺納遙碧平几挹橫黛青山信在
茲心鏡兩融會豈效逋客徒匿情給松檜咨余秉微尚
頗亦厭塵壒幸君分半青著我函丈對

遊巾山得晴字

巾山何亭亭拔地蹲中城蒼龍擢雙角盤空闢孤撐
崇雉儼環抱兼如在滌牲有時霽霧塞插我堂東榮
雖勞拄笏望猶賒杖藜行值茲陽和候鮮暉吐新晴
擺去纏牽累少暢窺臨情藉蘭得勝引共此酒一盛
咏餘百憂集樂極萬感生去國魂難招懷人涕易盈
雖無丘壑姿宿昔芥塵纓寄言山中叟未慕同幽貞

次韻徐景說見寄併呈年存叟

東南有華屋結構清江濱規撫百年遠庭宇無纖氛
前

林藝杞梓後圃植蘭蓀嘉賓日還往門戶生精魂雖慚
北第壯猶能植乾坤主人遺後意豈欲徒飽溫相期大
此屋傳世垂無垠人事一朝異祖訓成仇冤姦隸竊其
柄良朋中路捐殖貨以自封顧笑以為歡耳目就聾塞
誰其與忠言不念乃祖心望爾椒聊蕃感激當世事家
國初無分宗子誤置相匪人轉洪鈞渾善樹羣慝瘠國
開亂原權豪競叨憤赤子愁吟呻我室既盡毀大敵將
起吞貌焉蟣蝨臣埋輪承誤恩晚冀不能擊狐狸加霆

震撫已方自慙顧指為尤愆百壬妄見猜欲取棋枰翻
誰知孤臣心但求王室安舉目百嫫中莫若二子妍願
識徑畎徑更認存齋存歲晚定三友短羽追孤鶩

迂杜丞相樣舟白鶴山下有感

維舟候新鉉薄言憇茲山叢祠倚層阜迴阡俯澄灣
竚立心目瞿白鶴懸榜顏嘉名契舊隱身疑墮其間
省嶂森古木荒塗翳枯管田空少鴻鴈谷腥富豺獍更懷山
中人騎鶴去不還平生抱炯介輒張困羣姦徂謝易永

久十年閔松關紛吾信虛薄宿昔蒙矜碩及茲落海嶠
初心汨憂患竭來因見名感涕淒其潛亦欲蔭青茆賞
心諒難攀孤憤竟何及顛毛自令髮

龜溪卽事五首

頑雲鄙鶴嶺積雪明龜溪枌榆社已屋斯焉卜幽棲亦
有好事人除館溪之西門巷寄深窈青山有攀躋平生
秉微尚頗忻詠歸兮且可投吾簪安能棲會稽

原註史
嵩之以

冬雷封事見遂
改予越倖不赴

父兄吳下宅師友茗溪磯亦欲從之遊煦濕相因依睽
孤諒無樂旅瑣良可唏古來遯世士獨立取衆非咨予
匪能然翼短難高飛懷哉訂頑翁示我真指歸

王庭陟俊茂三年蝨其間愚忠竟何補積咎成丘山媿

彼海上漚臨機歎其翻昭

案原本有闕文

嗟嗟亦胡顏汝今尚

無覺復倚榮辱關晨門獨何人永

案以下原本闕

二疏仕漢庭才術相頡頏竝傳已云寵同歸更輝光蹇
予與季父砥砢而琳琅不才自宜汰顯斥庸何傷處我

嫌疑間斯義安所當潛聖譏鄰醢焉庾渠肺腸

原註高之謂叔

姪同朝有嫌

曩從太史氏論次金匱書龍興渡江後廢止今皇初徵
辭記當時隻字寧敢虛彼阿者誰子顧欲私毀譽陽秋
記慕容史記名山儲二子亦過計人心焉可誣

原註寧宗帝紀

之未嵩之妄加毀譽於理宗濟邸改予所草

送不浮弟歸金陵

分袂四百旬盍簪三十日君來一何遲君去一何疾題

彼原上鵲飛鳴不相失奈何緣薄宦參辰各方一我鬚
盡成絲君紛纒如粟人生幾相見歲月去如斥兩蘇欠
同歸二陸事堪慄天倫盡中薺富貴劒頭蜜罍下饒蹲
鵲吳中富仙術縱不死同丘其可生異室願君解龜後
休汝毋他適建鄴水易滋武昌魚多乙
原註不浮昇
鄂皆有屋急
來共藜羹蔭此青林密春風棣華開溪頭望歸鵲

不浮次韻予亦再賦

咨余運類侵非復少年日嵇康既習懶長卿又嬰疾避

客如避仇俗子意多失獨於聲氣同迹兩心事一糲飯
盤菹芹濁酒邊撰栗家食雖清貧尚有幣餘斤每思世
路巖身不寒而慄何如掩關卧黑甜過崖蜜覺來荷長
鏡樂園斲芝朮末路值令弟自遠造餘室未久欲思歸
依人似高適飛飛羽差池秋鴈避春乙可憐陸士衡鳴
咽送親密撓音轉回塘無由望文鷁

讀謝章奏疏賦朝陽吟

岷峨秃如赭江漢濁如泔云何只隔夜潑黛接青藍得

非氣沆碭祝融困西戡秋風抗手謝天公吾敢貪此邦
舊崛奇神氣虎眈眈山為萬仞高水作千尺涵爾來遽
一變風景殊不堪月墮雞不晨露警鶴猶舐長畢綬若
若修緡府潭潭坐令死瓦色空濛亘西南劃聞卷阿奏
翠鳳鳴孤嵐尹氏誰敢指家父獨縱談三十六峰下有
此奇偉男戛摩參井釁剗礪山川慙予方感發緯耳此
距躍三作歌為賈勇罪我如飴甘

吏道

勞牽迫吏道儻若洪縻拘九春回塵土一迹園林無直
此休沐暇偕我良知娛殘梅謝衆卉初柳萋僵株四運
巧相斥流目悲榮枯俯仰潺湲沫惻耳彌驚吁故山渺
何在漱石良辰徂為邦歲已暮宣城可歸與執柯勿睨
視州有達士模

物貴

一從泉法亂都野咸荒荒片楮母偏重無子相低昂姦
人竊其權百物因大翔握薪重尋桂尺魚貴河魴我聞

輦轂下鞅法牛毛詳物物揭成價大字懸康莊撫鮑摧
公肆餅師聚官場市易祖嘉問均輸肖弘羊罰羅四面
布搖手觸刑章哀哉今之人逢時何不祥穀斛八錢漢
米斗三錢唐安得生其時鼓腹詠太康

增賦

吾哀天寶後刻剝窮錐刀且實不得喫蕨賣輸官曹

原註
並見

詩史民生於斯時生意如鴻毛安知咸淳際赤子滋磬磬

稅租責三倍田野晨號咷桑柘未茁調帛已騷騷驕

兵飢醲鮮黎民窄糠糟九關虎豹守哀籲愁天高

桑貴有感

我老與時忤十年守窮空衣食相驅迫遂師田舍翁每
當春蠶起不敢怠微躬晨興督家人留心曲箔中客寓
無田園專仰買桑供豈謂桑陡貴半路哀塗窮三百變
三千十倍價何穹家貲已典盡歛費猶未充乃知楮法
壞流毒刀兵同蒼天此何人血面訴難通棄蠶滿阡谷
行當歌大東預憂兒女曹凜冽當嚴風我窮何足道四

海關吾胃赤子已露立視天猶夢夢

劫桑嘆

美哉幽郊道風日清且熙
條桑紛冉冉采繁復祁祁
盛時不可再亂世誠堪悲
守令既闇懦兇黠何紛披
千林非無主奪攘無孑遺
白刃鬪原野長叉守路垂
羸童擁樹泣弱隸空籃歸
更憐貧家女束手看蠶飢
爾蠶何不幸生此叔季時
千筐與萬箔委棄如京坻
昔聞花門亂倒麥折桑枝
幸無風塵警氣象胡爾為
天門萬里遠吾君

那得知恨無古膚使觀風采吾詩

次韻不浮問疾末章及蝗

卧疴連夏秋爾來收藥喜羣腴久嚼蠟今始甘魴鯉自
非天矜憐安得吉祥止寄聲問何如感此遠方弟炯然
憂愛心諄諄見詞旨兼饋藥籠珍廢疾居然起末章悼
飛蝗布陣長千里那知自北來今亦徧茗水公田吏如
虎收拾無滯穗訴傷服大刑遑哀室如燬古來此亂國
赤子先遭棄北橋千萬倉何翅教洛峙一粒不肯捐肯

念飢由已謹勿傳吾詩隙間天螻記

題錢可則芟雪庵

我家雪山下結茅幾度秋一朝劫火燎身墮江南州相
逢炎雪君感慨不能休我今如喪狗狂走長包羞子幸
成小築廊巖可夷猶何不學孔明草廬傲王侯何不學
袁安高卧絕行輶鸛鸞恍入夢猿鶴悽生愁逋客亮非
然誰其執怨仇山茅自高潔得雪逾清修三白待君足
毋為垢氛留

酒闌

世道日淪忽涔淚夜中滋客問子何傷傷予士氣痿不
見齊魯閩所爭在糟醅我吻燥已久幸歌韓奕詩若遭
禁酒國曹瞞爾何為一廬臯蘭下赤壁竟不支雖云竟
不支王翁自憐之騎虎不敢下悲鳴亦可嗤朝廷盡君
子拄撐賴公師似此好局面諸生願扶持尹京用老蔡
恐翻元祐規斯言是耶非識者當能知啞鐘懸清廟瘖
虎伏路垂此而為君子小人當謂誰幣輕物痛躍赤子

命一絲尚曰此元祐天乎欲誰欺
醪粢恩誠深報復機
誠危獨哀三百年
泰此終何裨咸幃不復舉
志士徒傷悲

蜀酒

我辭相國歸

原註趙公葵

遺我酒十器拜受起潛然為上有

蜀字狐狸之所嗥
種秫寧有地得非父兄血或是鄉人
淚我飲不下咽思廣相國賜願得投嶠江咸使西南醉
端午日觴客東湖遇雨移飲壽台樓分韻得壁

字

玄暉東田遊明遠東城歷深心慕塵軌湖舡擬觴客零
雨或尼之輟策駢茲席霽虹帶高岑傾羲被迴陌良知
共遐睎數陪竹林七境恬微尚愜賞勝幽懷適懷沙事
千載舊恨猶能闕延首瞻樓顏新愁渺難釋

原注新聞
杜丞相覺

天問愧非才且可浮大白徙倚驚漏窮晨宵挂東壁

贈道士劉友鶴

翰林紛萬族白鶴稱善鳴標榜在詩易斯義淵然精子

今自羽客復慕胎僊名烟煨吐奇訊警露爭圓清平臯
播聲蘭廣隰蔭芳苓於焉事飛薄安得有惡聲聾俗詎
知我胡為枉櫻情帝鄉闊萬里短羽無遐征

讀哲宗長編

我於咸淳際偶讀紹符編昏氣塞宇宙臨文深慨然孽
惇暴於虎秦陵度如天惇言一脫口輒奉以周旋嘯呼
盡頑克排斥咸忠賢意偏覆輟蹈時移善政還音旋濟惡
蔡元度推波曾子宣紀綱耳目地悉以私人專其間如

商英牙吻尤呀然神靈不可測黨人得生全矧乃崇觀
後於邑更堪言孝弟堯舜道禍反階中天聖經豈誤人
無乃說用燕孤臣淚迸血後來其監旃

近者昌言多出諸賢之後有感一首

吾觀唐虞時輔佐多世胄一時謀謨嘉十世典刑舊古
道日以衰象賢始不懋近者梧桐鳴多出芝蘭秀杜李

倡其前

原註杜清獻之子
淵李竹之子務觀

劉胡繼其後

原註劉侍御漢
弼之子胡評事

夢昱
之子

最後康樂公

原註謝漬山
從子名章

卓出漢庭右元氣倚迓

續疵國資匡救起予氣為增感事眉復皺彼出進士科
視此矜廉茂誰能持我詩往為披恂督

生日自嘲

今朝出門去路逢揶揄子汝形何龍鍾汝色何顛顛人
皆鑽當路汝獨鑽故紙故紙高泰山不直一杯水當路
衆所趨汝獨無一字玉堂炳官燭金華曳絲履珥筆立
螭頭屬車陪豹尾世人共歆羨汝乃獨掩鼻七十不同
頭汝亦自苦耳抗手謝少年吾今將仕矣

次韻俞掾縣尉見贈釣臺賦梅

巖風摺繁圃嘉卉難為香坐令衆芳林直為蕭艾鄉妖
紅與嫵紫乘時鬪新粧梅生處局外矚然絳衣裳獨無
摧折憂一笑春洋洋猶懷臭味感苦口嗟難嘗風人妙
託物予德慚非涼坡公詎為役涪翁可齊芳尚此短兵
接當君陣堂堂

齒落

韓公四十五已賦齒落詩呀然頓崩弛存者皆浮危我

今恰半百衰暮固其時一齒闕當門撼其秋葉飛感茲
生有涯撫枕中夜悲伊人未聞道文與百世期吾今食
粟耳將隨野草萎聖路千萬里加鞭猶可遲

次韻功遠兄惠詩見勞

平生聞父師擇術明諾謬豈不依德言其奈根器弱昕
庭開獸樽坐聽諸臣咋誰其酌嘗之自牖勤納約維時
鶴山翁鐵作元祐脚振鬣一以鳴萬馬立皆却此老埋
虎丘自頃氣何索微音闕不嗣吾儕得無忤偶從鋒鏑

餘來被纓組縛每懷季父風自笑吾瘁惡十駕希乘黃
其敢自菲薄啾啾竟何裨有如叢間爵那知桓將軍早
已憚孫綽歟彼譙上鷹掣臂將汝攫何不追冥鴻幡然

見幾作會逢故人劉危言取貽愕

原註劉起為博
士輪對甚偉

腥腐忌

雕胡蕒菜妬芳若遂仇作俑人意欲屏醫藥

原註予對
班偶在劉

前亦及嵩
之故爾

樂哉餘不亭閑身頗堪著寒谿靜可鑒青山

岑如削未能及黎侯且可棲晉鄂憑誰共行藏歸語故

山鶴

贈蜀僧欽師

天台招提數我常避其塵夫豈無名緇近膩終汗人

原註

時驚寺之風頗盛

衲子來西州見之獨情親豈惟枌社意亦喜

叢林聲欽公惜我去索贈良殷勤子道我弗學安能淑
而身雖然第一義儒釋曾何分要踏石頭路須還鐵脚
根

次韻李通甫賦中秋

秋容滿茗谿天籟生菌閣幽懷對蕭辰意味更沖泊招

朋傾一盛相與慰牢落抵掌談世事亦可資一噓須臾
白玉盤高掛青綃幙賞心與景會喜極悲還作渺然望
西南慨想舊猿鶴豈無首丘情歸去事耕鑿奈何朝廷
上聚鐵方鑄錯原註時余
晦將入蜀棄置勿復道洗盥更深酌我
老倦吟詩無悰紀行樂故人詩筒來晨簷有鳴鵲

送劉養源遊吳中

自我識松澗于今二十年

原註浙西
憲俞拔

譬彼鴻與虬薄霄

而棲川憶昔初見時予客劉養源邂逅一相遇松澗稱

其賢蹇予久騷屑養源亦蕭然攜家輦轂下炊玉斗萬
錢貸粟監河侯蓋為生事牽訪予茗之濱欲學東方先
率然集吳地求汲松澗泉予謂子往矣轍鱗今復鮮杜
陵送李君南入黔中天應為汧公醉剝操雲嶠篇

次韻不浮和東坡端午遊真如寺

君居秣陵時日夜書旁午念我方投閑遠方同甘苦別
來日月長如髮不可數弟兄兩浮萍功名一炊黍相逢
飲佳節小慰情悽楚東坡舊公案君房妙言語乃翁滿

腹書一字不堪煮晚歲膝上君端能繼華祖我已困屠
龍君應思畫虎相期寸田耕心亨無齟齬

平生欲一遊金陵而不得再用韻簡不浮

金陵帝王州遺事多典午我昔讀其書撫卷輒淒苦一
昔豪傑士錯出可勝數榮名既銷歇陳迹付離黍惟有
東山翁于今尚翹楚我欲一訪之千載同晤語酒於白
下酌茗向鍾山煮北道有主人載酒思出祖但畏傍人
譏率野非兕虎此事從昔然非予獨齟齬

不浮欲卜居雪川而未決再用韻趣之

君如夏日槐濃陰正亭午我如秋渚蓮心老味加苦卜
居既未果會面真堪數二米同一稭何時如拒黍我今
居異邦一齊咻衆楚出門無所詣欲話誰晤語盍念荆
同生母憂豆逢煮急來共伏臘相與續妣祖昔人兄弟
多八龍及三虎安有予二人而堪長齟齬

不浮弟攝興國守書趣其歸

自君攝富川政聲達王畿鄉邦大夫士相率聯書馳欲

控江州督版授俾真為羣來質於予予則力止之父兄
本公論彼反疑為私諸公悵然去未免方輪咄日者名
書來自言攝承耆駕馬戀短豆或者能無譏累牘上尚
書願趣新侯來白頭分趨幕不敢求旌麾開書喜見面
與我同肝脾高安別未久德進兄嗟咨我今亦復然坡
頴真吾師雖無逍遙堂遲君同賦詩已掃安樂窩扁舟
早來歸

次韻王深道領客登翠屏

東皇趣歸旆行色在隴麥撫舊念易盈感逝憂難釋謂
春姑徐驅為我咏今夕天涯浩漫漫迷路那可索林芳
坐自銷庭草已如積南亭慨靈運東園悲阮籍咨余畏
簡書無路追羣履故知凝睇處惟見唼尖碧如叩欠宿
願入越成誤適一笑命淥樽人生匪金石

題王茂悅郴州白水奇清園

原註瀑
布也

靈區有異產化國無潛珍坡公論人物我則賦奇清壯
哉此白水誰其瀉青冥薤藏富媪畲挾剔天公噴霹靂

起神物顛顛擎巨靈陽山得瀑谷永嘉賴斧斤乃知出
世事須待開物人倒懸訝瑤池吹立驚滄溟千穗落曉
鏡萬仞垂天紳清寒入山骨霏潤霑人巾麝麝為瘦爽
草木皆堅貞矐仙挹瓢飲俗士前塵纓度堂匪秩讌築
館先儲英函書靜秩秩子佩來飭飭清風濂溪像古栢
文翁庭從容講道要宛轉餘詩情謫仙一派妙休文八
詠新茲惟佳山水我嘗駐騏駟平湖尚蕪漫絕境宜荆
榛按圖重慨嘆歲月今崢嶸壯觀誇好句窘步歌豐擎

聊以贈我友無庸寄山神

書室揭劉元城陳了齋像以自厲

我昔天台游偶得陳公像以公謫是邦祠堂懸真相尋
執憲于衡復得劉元城以公子孫寓家傳遺寫真揭之
書室內朝夕得晤對焉能為之役妄意他年配劉公色
貞堅疾惇固宜然陳公甚和易排京乃敢言惇京為腐
草二公長不老汝其擇于斯庶以傳不朽

次韻詹丞賀得祠

我生天地間自笑一疣物燕蝠爭晨暝龍螭安伸屈三
度侶黃冠十載謝丹紱無學陪旃厦無才演綸綍晨策
恣幽探午窻饒睡兀平生正坐口自使窮到骨紛紛蝶
爭春悄悄蟆啖月從來彭澤琴不勝昭陽羯安有冷笑
姿可入豔陽節積年幾穴床經旬不踰關時逐志和風
慣卧袁安雪初無子公書誰其項斯說忽令管龍宮傳
聞從鴈帛還來弄香火幸不廢書冊偷閒容我輩用世
付時哲鵬鷗各逍遙何煩較優劣

感事

太師百僚長歷代皆有之所用有賢否邦以分安危惟
彼太公望桓桓定周基至於尹氏徒寧逃小雅譏漢唐
姑勿論我朝有元龜潞公四朝老德望欽邊陲吐故京
檜侂言之可歎歛近者揚王庭舉朝莫言非文潞不可
作吾其誰與歸

鬼瞰吟

相公不入府却走湖上宅朝游廟堂上暮作水雲客公

府爵羅張別墅車轂擊三日斂履朝萬楫戈船疾

原註出朝

以軍船涉西湖人以為不祥

畔官義和誅離局春秋責主寬置不問

士佞那敢斥倡優湛夜宴臺館窮晨策華堂枕千巖幽
龕通百尺知非晉公洞故是伯有窟蘧蘧夢蝶飛冉冉

長蛇出

原註大蛇出於其寢

煩冤哭中夜魑魅來白日方期燕婉

求難拒幽明迫天不相厥居鬼乃瞰其室不見霍氏亡
千妖日叢積不見蔡京敗萬怪無寧迹持危豈顛墜起
穢宜蕩滌君看韓家園斜陽空寂歷

次韻劉養源見寄二十韻

山寺傳好語盈耳歡聲騰側聞新天子有意綏黎蒸金
雞肆大青民散蒙哀矜詔書日夜下合沓來凌兢訪落
首鮐背導諫延龜朋講習召遺席軺車聘才能官簿還
故邸孝思齊定陵宛如春氣至頓釋朝霜凝神龍妙虛
雲妖狐疑聽冰維今萬牝政欲言何可勝安得批肝血
排雲叫觚稜崇蘭變成艾春鳩化為鷹貪夫野外質善
類風中燈百壬各自媚兩如偏見憎

原註選詩事
蹟兩如直

盈庭

蒼玉佩絕響朱絃繩願我聖明后金臺擇先登昭蘇贖
賸聽凌厲高高層陰霾半夜駭日月高衢升吾儕老猷
畝鼓腹歌中興齒髮已自料息翅甘冥鵬

要君

聖人戒要君春秋罪同弑推此無上心將何所不至近
者凶相歸決烈誰能比羣愚惑其跡咸謂難奪志老夫
非聖人固知決無是或問何以知荅云非奧祕豈有患
失夫能為勇退事未聞介推歸留母以為質府中俱蕩

析般移到花卉殿前卒二百輦載填城市都人尤其愚
家家失歡喜謹言真不返剝剝競彈指朝士獨可憐一
朝失怙恃聯章乞還相留莽無少異天王雖聖明勉徇
非得已御前金字牌一日數十置冠蓋何紛紛排日遣
郎吏端明奉璽書侍郎傳睿旨師王袖親批祈懇留涕
泗相公卧愈堅那肯東山起陛下如迫臣臣當還故里
羣使駭其言連名奏天陸安知夜半舟已渡曹娥水新
亭候徒勞劉裕已還第狄青度崑崙李愬擒元濟忍於

君父前用此軍中詭一勞可永逸所欲已稱遂從今政
事堂深根且固蒂願已愜臧孫專當踰季氏上蒼孔威
神那知從汝未

五月

五月出師時老臣抱憂懼端筴問詹尹願告吉凶故卦

得明夷中驚愕不敢露庸知三日後日晡大可怖

原註六月朔日

有食之既天象與人占真如相對語師出無寸功敗書常踵

路世道復誰論當局委而去更令水中榆枲梟擊樂露

原註露義不同故並押

秋風日以高吾未得死所援筆識著辭淚

血滿襟素

原註明夷上六不明晦初登于天後入于地象曰初登于天照四國也後入于地失則也

應在德祐二年正月痛哉

次韻方泳道沂見寄

延首浙河外浮氛翳青天下有豺與貲紛其集中田況
復直歲稔蒿萊莽連阡民流入他郡百里無人烟咨予
忝觀風七州命所懸駐車問疾苦入耳潛潛然期令萬
蒼黔生意春無邊一網獵羣獮其敢諉力綿天王自聖

明凝旒蔽其前曰此何罪辜而誣飲貪泉奉使既不稱
還印歸民編南窻可笑傲雙溪恣流連不貪金門步不
慕東壁躔但願紫皇寤赤子逃烹煎賢聚國脉壯吏良
民瘼痊臣雖就九死沒齒無怨言方子遠投贈厲我彌
貞堅枯木已無心安能被朱絃江水尚可楫吾其劒西

川

次韻王深道見寄

虛齋隱几坐憂思來萬端我帶舊盈豁忽復數孔寬追

思昔迷復驅馳困塵鞍終蹈世塗險衽席生龍灘平生
仗忠信意若無驚湍雖有被野羅何篡凌風翰髮憂抱
耿耿進退良獨難亦欲紉蕙苗殷勤奉所歡

原注離騷以君為所

歡
終疑薛居州一暴難勝寒衆陰日夜長正氣日以單

國枋落熏腐民生困貪殘言路久榛棘肉食咸空餐蹇
予宿嗜好與世殊醎酸柰何不自愛當門植芳蘭故效
五柳君歸求容膝安我友在天末洞我腸與肝新詩妙
鐫發字如湯銘盤盍簪眇無因東望慨其歎遙聞病新

愈致我囊中丹願君彊吞咀百年永相看

次韻劉友鶴端午三首

昔經屈原坂寒湍下悲鳴又渡汨羅江
汪記曾輸誠慨彼幽亂國成此湘
纍名彫胡不受膩渚予膳膏腥離騷
二十五往往言其清招汝千載後來乎
不來靈

桐江五月涼波上搏層颿傷屈念已愴
懷嚴瀨逾滋維彼不逢世如斯良遇時
懷沙與釣瀨異節同光輝故人去奚傷
宗國逃懼非精義貴有質聖遠咨從誰

箋天欲移病心與孤鶴飛苔青弁峯秀遙昔夢佳期恬
鱗慕深藻倦翮懷安枝焉能繫浮名輦翔辰昇霏已約
東里伴無煩北山移他年倚礪門望子踰躔衣

道中遇雨

車中覽書罷舉頭失青山五日無纖雲春晴固應慳須
臾驟雨過忽已羅青鬟天公自知我所遇無不安奈何
苦相戲晦明翻覆間浮雲雖暫收未肯故山還終當買
不借踐此泥塗艱

送王深道赴荆門教授

蒼龍掛秋漢涼風鼓吾袪夜中不能寐慷慨悲有餘美
人背我去山川渺盤紆平生嵇叔夜龍性不可拘以茲
直諒益弱念咸刊除四海豈無交誰為真丈夫溫蜀本
兄弟不過姓氏殊臨分悄無言執手空踟躕世事舉目
知安能共淪胥君理江介柰我念茗濱廬後會難前期
且復立斯須努力崇明德歲寒盟可渝

次韻北澗禪師留別

維北有深澗其中貯幽泉
茲泥不可滓萬境涵澄鮮
人挹其流濁世相周旋
清寒滌腴膩八斛不敢專
我來宿招提踰月從金仙
解后澗瀕老筆力回百川
參寥一以去詩宗久無傳
阿師佩密印絕後如光前
禪房竹色靜秋深暑將闌
雙嵒儻入夢寄予白雲篇

中秋獨坐有感

三年三中秋月作一樣
奇清貧不設客老倦不吟詩
今年更淒涼兒孫鎖秋闈
獨坐南窻下兀兀如孤羆
追思歡

娛地無如少壯時尚記壬辰歲鶴山靖州歸八月十五
夜月華散前墀諸父秋山閣羣從幽芳池賦詩各分韻
醉墨紛淋漓鶴山讀我句終夜相嗟咨明朝操紙來傾
倒里中兒一往三十載坐念心生悲前輩已彫謝諸兄
亦無遺奇孤一身在流落天之涯明月如昨日而我鬢
成絲天人固異分何煩涕交頤

又中秋分韻得處字

西風滌殘燠秋水靜如瀟客心悲未央感茲年芳去聊

攜池上酌相與豁煩慮我殷楚以陳曾未舉前箸延首
視太清飛娥已來御屏翳雖放紛不敢捩眼覷清輝豈
不佳祇益畸人苦故鄉值良辰輒與親暱醺轉蓬隨天
風異縣不可據明年看清光那知又何處

自敘六十韻

蒼蒼大哉山高標致青天西江走其下東井纏其顛積
此二儀氣鍾為萬古賢粵從揚馬來作者接項肩我家
高陽氏遂古已嬋媿爰及開府公世德乃昭宣挺生六

男子如鼇海上連逢時供世用報國或軀捐

原注先忠襄公二

季遇明主皇極佐後先英芬播家國餘輝照山川咨予食

舊德一綫千鈞懸結髮日礪砥植節圖貞堅龍飛四十

春先皇始招延絳侯正驕主荅策聊相鑄無心得天下

人力何有焉有司矜其愚寘之龜列前先人既死城

案原

本缺一字遭禍愈挺挈身歸君父叨沐登史筵是時嘉熙末

大臣私自便抗疏警其偷側目尤讒言

原注喬行簡

未幾孽

嵩來當國恣且專白發竝相議

原注庚子冬雷封事

一斥踰三年

祁公俄入相招我赤城邊公尋薨于位游老司陶甄蓄
縮多畏忌百壬開煎煎汲黯又妄發羣庖益呀喧卧家
百餘日遂棹嚴灘船偶乘浙東傳入手埋輪權南床有
婦翁出桺流饒涎劾章格不下使者反歸田流落經七
載那復凌翔鶴淳祐更化瑟弓旌羅八纏例叨赤車使
收召湘江壩南宮甫踰月遂玷蓬萊仙仍侍玉皇案兼
操金匱篇主恩海嶽比每欲輸塵涓謝吳對持鉉國勢
如舟偏薰猶共一器兩黨操戈鋌予與趙徐輩放逐紛

聯翩吳公亦去相國事堪潛然荏苒兵難作擾攘紛戈

鋌吳公再秉鈞首議賈生篇諸梁尚當路

原註沈炎

公願竟

以愆亡何事大異萊國寃南遷國忠亂天經黨禍何連
延傷哉淳祐士蕭艾化蘭荃腰金空照地噤如秋後蟬
嗟我亦何人趙璧乃獨全挂舌坐林間嫠憂耿無眠一

旦彗星出應詔言數千歷數蔡京罪請收賈克權書過
不得上龍髯已飛天尚有聞戒集祕之未敢傳其間朝
陽吟好事達湖弦幾欲齒姦鋏終虞隕深淵偃蹇踰十

載永山尚頑堅不學李拾遺盡付酒家錢不學杜拾遺
窮愁詩自傳聖涯浩無際前路渺以縣且復繫寸景終
予犀革編

池荷就衰有感

雙池萬荷花姣好欺子都秋風一披拂槁悴如三閭子
有君子操昔人所歎譽奈何不自奮俛仰悲榮枯荷花
不能言請以意對吾兩間草木蕃萬象繁以舒一從鷗
鷖鳴荃蕙首見疏況我值末運忽忽良辰徂相隨就衰

叔容色何能愉抗手謝荷花子誠志士模嬰肸悼季世
真千感淪胥春陵大中正所品良非虛

九日分韻得花字

秋日何烈烈憂心在丘麻老圃跬步間無悵問黃花及
茲九九候清樽暢幽遐朋簪既肅穆宴豆亦靜嘉風雨
知蕭辰颯然掠牕紗喬松助聲勢轟礪掉狂車萸囊頓
精神似與老守誇淵明有三徑我獨歸無家浮騖竟安
適佇立空咨嗟

學詩

燕說談古書六籍無詩如彼序鬼一車毛鄭責其須古
今幾大儒亦復鼓應桴歷年二千餘耳目為所驅卓哉
紫陽朱訂頑砭其愚俗說力掃除沙沉得簡珠士惑真
難祛于今道猶孤高叟一鄙夫服膺與世殊在天懸方
諸如聞嘆起予

讀書

問翁幾何年翁年七十餘尚作蠹書蟲嗟翁一何愚旋

增通典缺旋修阜陵書毫芒集閱盡白編還卷舒五詩

諷被底

原注選李杜韓蘇

柳集誦日晡玩物能喪志聖賢言皦

如賦受有奇偏誰能為耘鋤

讀荆軻傳

夜讀荆軻傳掩卷喟然嘆結交天下士賢哉太子丹報
秦一片心秋蓮孤劍寒介紹田先生得結荆卿歡太子
一語疑先生甘自殘荆卿欲藉手臨事敢開口走見樊
於期願借將軍首將軍搤拳言念此固已久得復平生

金匱山房集 卷六
讎性命何足有四雄英烈風精誠凌白虹
函關初未入氣已吞祖龍其事雖不就
簡牘光無窮奈何今之人感縮如寒蟲

九日會客面嶽亭以采菊東籬下悠然見南山
分韻得采字詩

四運相摧斥秋容忽而改
英英晚節花含霜發鮮彩
游子感蕭辰命侶登爽塏
湘山儼橫陳秀色如有待
獨憐祝融峯盡日埋靈鑣
安得誅雲師吾將罪真宰
悠悠元

亮心千載宛如在遙知把不盈搔首終朝采勝達不可
追迷塗誰堪悔棄置勿復談且復澆磊砢

謝鄭如晦餉酒詩

淵明久閑居欲釀苦無秫蕭條倚東籬目斷盃中物可
人王荊州白衣來扣寂高情屬天雲于今照方策我窮
交舊絕門外無行迹舊時如海腸輒鮒等枯澀誰憐東


溟臣西江分一滴嗟哉子立賢

原註王子立
子由之壻

肯念黃州

客清酒冬百壺昔酒夏千石陶然北窻下但覺天地窄

東西高雖異南北鄭能一感荷吾子德酬報乏珪璧但
誦昌黎詩以謝鄭羣錫原註昌黎謝鄭羣錫贈簞詩明珠青玉不足報贈子相好無時
衰



恥堂存稿卷六

欽定四庫全書

集部

恥堂存稿卷八

詳校官起居注主事臣顧宗泰

主事臣呂雲棟覆勘

謄錄監生臣秦 澐

謄錄貢生臣王兆泰

欽定四庫全書

恥堂存稿卷七

宋 高斯得 撰

七言古詩

題天台夏肯甫曉山亭詩

謝公晨策花崖登杜陵早起開前林微之朝挹西山爽
退之曉望南山稜古人看山自有候箇中意味誰探尋
林霏夕斂羣動息澤氣宵上英雲蒸不於此際毓神秀
安得向曙嵐光凝平生苦不識夜氣見山忽得鄒人心

卷書默坐會有得此豈文字能摹臨斯亭題扁有咀嚼
慎勿只遣供閒吟直須敲破第一義庶幾山鬼逢知音

題趙致道茅齋

三百年前茅屋歌誰其繼者茅齋銘杜陵憂世何其切
鶴山觀物何其精兩詩妙處均不朽吾能合異融其真
綺櫳雕宇貯豪士此豈有意矜吾民從來大庇天下手
乃在茅棟茨檐人請君觀銘驗吾德復來歌義充吾仁
庶幾體用歸一貫二老可作當欣欣

五月六日約諸友遊北山舟已具而予偶不能
出諸友和坡公法華寺詩亦賦一首

區中無由舒眼界欲上雲峯觀九派頗聞黃龍擅奇特
僅得窺臨真一快清茗一綫僅委蛇具區萬頃何滂湃
又聞法華兩招提清曠負絕人境隘池光潏灩鏡無臺
山色清寒身不壞石林幻出三玲瓏萬虎千羆斷雄怪
幽貞叶策天相之梅雨初晴白日曬州家幸肯借官船
亟饌魚鰕菹韭薤奈何欲往竟不諧徒羨諸公脫天械

歸來爭發古錦囊
令予伎癢如爬疥
嵇康本自不羈人
況復時屯方翮鍛
終當於此結菁茅
庶可償渠猿鶴債

劉友鶴以詩贈別次韻送之

昔披朝霞尋洞天
五峯矗漢高巔岼
靈君營魄去千歲
秋桂春蘿空鎖寒
古心未死不忍去
搖搖風塵空中懸
五年失脚墮時網
夢思重到無由緣
竭來出守山水郡
公餘頗得窮幽偏
丹丘仙客舊心賞
騎鶴過之同晤言
詩妍青林華煜煜
氣老幽澗松桓桓
問余君土信奇絕

孰與吾山多紫烟桐江緡魚烟志節維山笙鶴誇神仙
能衡鐵炭識輕重衆山部婁真如拳羽人聞此深領會
笑指雙臺催棹船題詩莫作世間語會有剡別青苔看
時雪應禱周子車和東坡所次柳子玉韻見貽
用韻答賦

大冬愆陽人久渴井泥無泉百川竭老天有意濡沫之
一夜幻成三尺雪勿嘲見卯索時夜在眼來年疑彷彿
蹇予誰敢貪天功片片無非后皇德由來此物貴臘前

況復霏霏當暢月坡公守潁足風流坐看斜飛詠愁絕
明朝亦欲踵前規試與諸君相暖熱

出其東門行

原註刺郡
守貪暴

君不見會稽太守第五倫罷官潛去逃吏民不知當時
何所畏乘船夜渡曹娥津只緣惠愛入人髓攀車叩馬
千萬羣使君若不行詭道愛河浩渺難抽身舊聞吳興
解郡綬歸路南指朝天京爾來史項後先去云何却出
東城闔

原註史越翁項
公澤皆貪暴

橫山伺候不知數

原註橫山南
路小聚落

攜壺挈榼相邀迎使君自揣非壽我西子不潔將汙人
水軍二百耀南路三更一舸臨湖門會稽吳興迹相似
誰知愛惡殊其情畏匡戒薛聖賢有豈比汝曹祇自焚
嗟哉後人亦監此慎勿繼踵成三人從今要辦守賢否
只觀去路東南分

禹柏行

往年上會稽凌空禹穴曾得窺今年浮沅湘又見禹柏
蹲山陂茫茫禹迹遍天下獨此二物稱神奇凌雲意氣

銷鑠盡根心就化空存皮樛柯入地枯不死反更上擢
青銅枝被以九龍名流傳自何時得非木宿蒼龍精儲
英萃異成雄奇頭角崔嵬訝撐拄牙鬚磔裂相紛披孔
明廟柏信稱古上距何翅千年奇杜陵品藻一何陋遺
落鼻祖收孫枝諉云此地不身到何由得集衡湘詩鳴
呼衡之山巍巍湘之水瀰瀰地氣何太偏獨於草木乎
鍾之柏兮手植自神禹竹也種傳由舜妃誰能為天分
此界人物庶幾可使悍俗囂風移

題浯谿寺

春陵太守真好竒，結茅肥遯湘江湄。
三吾出意作新字，脫畧蒼籀遺。
永斯溪山於我本，何有占斷不許傍人窺。
人生天地遠，行客戀身外。
物庸非癡漫郎仙，去五百載名字永與茲。
山岬要知忠義不磨處，雖不自與人與之。
至今過者望卷石，森然魄動中興碑。
此公何用專壑鄙，世上寧有爭壑兒。
我來訪古刺蓬藿，悵然不識亭臺基。
掃出蟬噪發斯義，元子可作然吾詩。

次韻王深道寄題其弟敏道菊山

黃花有鑒能品人俗士往往遭眼白獨憐寂寞陶長官
到死同盟不相釋至今采采東籬詩千載晶光猶陸離
獲人妙質久無記羞對紛紛女曹兒子今風塵走異縣
故山舉頭不可見奈何友此隱逸花三嗅幽香意中戀
我聞瀛壖足隄州夢生八翼飛秋秋不須苦覓菊山句
晚節相期拂衣去

次韻不浮弟自金陵相過

老夫睡眼方昏花夢中忽聞歌棣華暮春逢此晴雨好
足慰飄零少陵老知君重踏東華塵先訪雪堂老師兄
大篇鏗錡來扣寂讀之宛如花萼集花殘誰復倚欄干
黃鶴催歸呼子安此花當屈第一指徐娘風情猶可喜
詩成共賦豈厭多惠連何不偕羊何

原註君朋
不來故云

古來難

并良與美報答春光一盛旨勿云數見恐不鮮勿憂相
煎豈冀然我今已信天行止小馮當門乃吾意一春花
惱只顛狂行樂最怕功名妨杜牧尋春遲有悔且須十

日澆磊隤

再次韻

神仙不求三朶花顏色不求陰麗華但願時清風日好
娛此無裘癡鈍老花光雲錦柳麴塵買春不用孔方兄
止過寂寂還寂寂有弟有弟遠方集客來我常為段干
長恐高卧驚袁安踉蹌開門門指指為見阿同無量喜
阿同爾來新詩多句法不減水部何盎然醺人如酒美
夢回牙頰聞餘音我詩端如食小鮮間廁八珍徒赧然

掀髯浩歌不能止酒酣一麾鐵如意高樓槌碎謫仙狂
茫茫宇宙隘而妨手捋虎須終不悔謫仙與我如龔隗
絕交行

男兒獨立天地間太華絕尖一何峭子房不肯下蕭曹
伯夷本自輕周召往來舞袖拂雲霄醉裏扁舟凌海嶠
鳳饑肯向雞求餐玉潔不與蠅同調山高路斷客來稀
日晏屢空臂爭掉窮塗李白友俗人歲晚杜甫交年少
前門長揖後門關當面論心背後笑雲門輕與凡耳彈

夜光莫怪兒童誚君平世棄政自佳老子知希渠所要
人間對面九疑峯未許衝風鼓無竅

物貴日甚

自從為闖以為暴物價何止相倍徙人生衣食為大命
今已勦絕無餘遺真珠作襦錦作袴白玉為飯金為糜
蒼天蒼天此何人造此大疾誰能醫無食吾欲食其肉
無衣吾欲寢其皮誰能為我覆八溟一洗世界無瘡痍
絲麻糞土被天下菽粟水火賙民饑風后力牧不可起

吾輩碌碌安能追

次韻徐景說贈安象祖

千仞崗頭孤鳳飛
翰林萬族驚且啼
桐江得樹一棲息
足以慰我饑渴思
飄然徑度爛柯去
再儀天陞來何時
子今追逐一何遠
所期不負平生知
獨慙託我非所任
沁水洋洋難療饑
夜光明月要人識
而我何知和與隋
端人擇友必有取
定交從此夫何疑
長安綠槐十二街
五都遊客爭奔馳
咄哉掉臂不肯住
來同聖路乘堅肥

嗟余舊學荒已久安能扣擊探玄機世事舉目已可知
淹留此土終何為茗谿一曲攪歸夢與子共賦臨流詩

次韻劉養源見寄

咨余暮齒依蒲柳見君無門慚九九小臣久去孔鸞庭
太史曾供牛馬走忽聞妖彗出不虞天子驚惶下手書
孤忠泣血悼危亂有詔不應心何如一陽剝盡羣陰長
四海八荒俱痛癢充庭溢序豈無人借問何人真挺鯁
老夫空憶陳王前語戇惟懼人抄傳擒賊擒王真古語

肯於鷄肋安尊拳相如雖乏三千牘自謂一言能報國
此腰堪斧尚不辭更問世間閒禍福但愁蠶護宸居深
司馬門遠終浮湛

原註或謂予封事不得達

德音秩秩猶在耳罪言

殺士俄相尋權戚當朝底時節不見朱雲攀檻折弗於
要處箴膏肓毛舉萬端何屑屑友鶴仙人當暮秋詩來
開卷風颭颭句法森嚴何所自丈夫冠冕垂前旒淡交
如君真耐久何不來同一杯酒期君他日孟浩然男兒
事業無窮年

次韻王深道見寄

社鷖屋鼠非難攻我力如綿不能動生令墨吏彌奮張
氣湧如山高龍從天王聖明侔日月跂望丹霄眦幾裂
孤忠耿耿達無路獨抱幽香分蕪絕諸偷恣睢方搖尾
忽報台州隨逝水人不代天天代人造物明威乃如此
嗟予粗不愧守官繫有承君鐫志完

次韻張頌見寄

掀髯一笑天地間八代文衰誰為起夷陵丹砂空自光

中山老魍不可使一從麥秀獲麟臺二千餘載無文字
謫仙豈無希聖心誰其起予二三子張君忽贈白雲句
墨妙筆精真可喜宗師竒澀費吟嘯三讀方能得其意
奮髯蒼鼠色無冤吐氣黑蛟雲可致恨子初筵我旅酬
妙處安能為標指懼遭掎撫不哦詩畏觸禍刑寧作史
翰林主人子墨卿昔也同盟今趣異不見當年聖德詩
猶被他人呼怪鬼慙君問我乞餘丸安得錦囊出懷裏
丈夫蓋棺事始定斯文固應付後死試問涪翁餘七言

松苓臭味固相似

西湖競渡遊人有蹂踐之厄

杭州城西二月八湖上處處笙歌發行都士女出如雲
驕騶塞路車聯轄龍舟競渡數千艘紅旗綠棹紛相戛
有似昆明水戰時石鯨秋風動鱗甲抽釵脫釧解佩環
匝岸遊人爭賞設平章家住葛山下麗服明粧四羅列
喚船催入裏湖來金錢百萬標竿揭傾湖至人相登
萬衆崩騰遭踏殺府門一旦尸如山生者呻吟肱髀折

西湖自是天下景何況遨頭古今歷一時死者何足道
且得嘉話傳千葉諫官御史門下士九重天高誰敢說
溪翁聊爾作歌謠謹勿傳抄取黥刑

三麗人行

有序

杜子美作麗人行譏丞相楊國忠也國忠貴
妃之兄近事有相似者以蘇公有續麗人行
故作三麗人行

麗人列屋芙蓉城烟紅露綠千娉婷朝回迎笑擁前後忽遭

唾棄嫌羶腥汝曹面作死灰色爭似平康坊裏人連眉
倒暈雙顰鬢臨春壁月陽臺雲西湖喧天歌鼓開列坐
長筵來狎賓紫衣中使天上至黃封百榼羅前庭海螯
江柱堆嵒峴猩脣熊白爭鮮新微哉何曾食萬錢陋矣
楊家送八珍酒酣自有娛客具非絲非竹非歌聲呼盧
一擲數百萬劉毅酸寒何足陳此時相公眼生纈平康
一笑華堂春鷄鳴鐘動却歸去相公手自與金銀恩纏
愛結無與比何意一朝遭怒嗔偶緣病起思破悶亟遣

花使傳丁寧誰知青鳥不解事還報從人嬉水亭立驅
百騎猝而至判司姓賈如弟兄同遊七吏俱簿錄一日
得錢千萬緡大書明牒令湖曲蘇堤掃迹無蹄輪風流
宰相推第一但恐稷契羞同倫腥風霎霎塞宇宙萬年
遺臭何時泯要當壯士為一洗我老無力覆八溟

次韻周子車喜雨

平生報國無才力日夜只祈天雨粟詎今歲事少差池
怪證誰云一而足入春郡國多苦旱起瞻四方何戚戚

陋邦愚守介其間造物私之意何篤桑蠶有歲麥有秋
十里欣欣人足欲爾來勤雨纔浹旬日日眼穿雲石觸
哀哉赤子命如綫亟籲蒼穹求迓續果然馬上天瓢翻
誰謂龍公慳一掬吾儕所學自孔氏頗信此身兼位育
真能辦得一寸心勺水固知焦可沃君詩信美嫌太誇
只恐流傳辜自速八荒延首待甘霖傳說誰具踵芳躅

次韻雪寒郡中糴米養源有賦

父兮兒饑母兮寒餅中無粟囊無錢天公何不知人苦

寧風裂膚雪塞戶我來日月雖未多舛令已干天譴呵
醫瘡眼下尚無藥更有妙訣瘳沉疴拔貧為富非不窘
坐視溝瘠吾何忍長民要識天之大此事前人固加謹
我倉我庾雖甚枵且須傾空蘇瘵凋慙無大德與汝曹
聊以小惠為寬條何時公私俱露積慰我片片心事赤
圩豐食可接青黃盜弭丸無探赤白老夫藉手得歸田
免譏取禾三百廛君詩太誇不可傳吾恐聞者譏貪天

莫恃勢行

夜燈讀書史標然撫予胃奇哉天下士英雄見略同子
長嘆息平家事謂勢於人將有窮謫仙作詩戒鯨鯢亦
云勿恃風濤之勢如白龍乃知世上夸毗子控搏外物
終成空君不見寡大夫圍初得楚章華臺前汗成雨鄭
田周鼎哆然求齊桓晉文何足數一朝乾谿萬衆潰饑
卧獨枕涓人股君不見夫差稱霸會黃池諸侯不敢扞
眼窺臨盟爭長莫敢拒吳竟為先晉次之中原甫歸敗
笠澤角東百家恠可悲君不見趙家主父尤雄強吞滅

代北如驅羊詐稱使者入秦地威風驚倒秦昭王暮年
立子一失計探轂沙丘終餓亡誦詩讀史餘更披金匱
書章蔡與秦韓往事尤可吁博欲族誅元祐人薦福鑱
碑立諸京紹興五十三家檜掌股慶元五十九人佞牙
齧章蔡投荒韓授首秦亦奄奄泉下人當時氣勢動山
嶽如今一窖寒灰塵後來視今猶視昔哀哉踴路雙輶
傾三書讀罷燈亦暗勦勦一枕東方明

次韻趙郎中

與

泛舟之作

危樓傑出清茗許一眺蒼然盡平楚倚欄興盡蘭橈舉
時聽長年作吳語趙盾當權人共苦白蘋清風渺何處
人生得閒價無伍天遣吾儕共休汝公孫愛客茶屢煮
風味端能繼桑苧晚涼一卮薦菰黍清唱時聞采蓮
女紀茲勝踐須燕許好與留題鎮烟嶼吾詩老去渾漫
與不畏傳抄殫萬楮

編局

舜為天子臯為士瞽瞍殺人執而已從來三尺天下平

析律二端真可鄙近聞編局蕩巢穴盡取鼠輩尸諸市
布衣韋帶三十餘筭配黥流動千里獨遺太學四五士
但以姦京法從事秦相不重褒衣人曷為忠恕而已矣
乃知能掉三寸舌極惡窮凶猶可恃大理得臯陶汝曹
應額泚

官田行

噫呼嘻樂哉咸淳三年之秋大有年近自浙河東西江
與淮遠及七閩二廣連四川黃雲一望千萬里莫辨東

西南北阡甌窶汙邪滿溝塍秧馬折軸擔頽肩天公更
好事十日不打雨三邊不動塵穠人更何慮自從田歸
官百姓糟糠難况復連年苦饑饉草根木實為珍餐嗟
峨殍骨橫千里待得今年能者幾只道伸眉得一笑酒
肉淋漓渾舍喜誰知一粒不入腸總是公家主家米夜
聞東家鄰偃仰啼孤婢我問汝為誰答云無食無兒窮
婦人今年公田分司官吏惡那有遺秉滯穗霑饑貧大
家京坻那復有惜米如珠藏在困我聞唐家天子即位

當四年天下斗米惟三錢我皇不減貞觀主相公亦如
房杜賢奈何米價百倍踰貞觀此病豈得無其源嗚呼
噫嘻我知之矣自從買公田豐年亦凶年此何人哉悠
悠蒼天更有一事尤堪怪欲說未說心先怕今年處處
皆有秋何故天台大水獨無一粒收一粒不收猶自可
臣水王君火囚此事頗關宗社憂書生守經論白黑無
乃將身豺贖投

讀陸遼常簿奏篇喜而有賦

老翁闔門貪睡味朝廷近事到耳疎朝廷忽收故舊信
得此痛哭流涕書書中所道果何事人心天命闢機樞
昔無叛民今已起赤子至此誰之辜公田下損而上益
楮法子廢而母孤三尺孤童盡知得誰能暴虎編其須
朝陽一鳴百賸醒幸哉僅有而絕無三后在天甚神聖
佑此一脉皇基扶我非慶厯石守道聊題數語昭羣愚

和劉養源

日景何須土圭測臘盡熙熙好春色明眉翠柳弄精神

調舌珍禽破岑寂疊嶂融融遲日麗雙溪渙渙層冰釋
行看騎簇昭亭曉還聞猿嘯高齋夕宛陵山澤紛紆餘
爾來憔悴緣急符安得春風百萬斛為散和氣還郊墟
北帝回車已浸遠東皇布令應潛孚原疇蘇醒天雨玉
草木滋潤淵生珠我詩背城猶借一吏氣暫掃因元日
預憂簿領還壓頭不得時陪竹林七茗溪葦間舟延綠
白魚朱橘不論錢幽棲已入五更夢早春顧渚何時煎
老師謹勿先抽單苦嫌道院颼颼寒吟編未載兩轂餽

莫惜娉婷珠一斛

讀梅福傳有感

原註因皇子薨而作

君不見綏和天子在御世五春畫堂甲觀寂寂空無人
豈無壯髮類元帝奈燕飛來啄皇孫三星屢暗紫宮裏
羣臣默默誰扣閤忽聞縣道上急變乃是南昌梅子真
書言願蚤建三統以孔子後上繼殷存人自立乃周武
王人自塞為亡秦陛下若欲保繼嗣成湯不祀宜留神
子真先曾往王鳳言不見省徒報聞小臣讀史每流涕

福於異代猶諄諄而況交柯紫荊樹東枝顛顛西枝榮
有能建此第一義本支百世何足云我今那復效梅叟
聊欲全生吳市門

記二首兒四日雷二異

咸淳七年正二月天災人異何稠疊細推厥咎端有繇孤
臣未言先泣血日當丙子月當寅

原註正月
十二日

湖州毘山

有妖孽曹家產子威殺人二首一身連骨節左首似爹
右似娘渾舍驚走趾欲折里胥不敢上其事一州喧喧

騰頰古從來天子天下首二首之占何待說我聞唐家
儀鳳年的證端為今日設涇州之民有生兒異幹同軀
不容裂是時武氏乘其夫唐祚中微殆將滅聖朝家法
與唐異四星在天循軌轍咎在君陽非太陰媧羿雖殊
禍俱烈人妖示變未三旬二月天災來不輟粵從己亥
至壬寅據厯雷聲未當發胡為砰訇震天鼓四日四夜
聲不絕上天威怒端有意要使吾君用剛決夏竦姦邪
致天變仁皇感悟真明哲只憑霹靂一聲雷掃去有同

湯沃雪後來高廟遵故典湯相罷歸同一訣奈何災異
過兩朝猶復留此大饗饗二首之兒四日雷占雖不同
應無別作詩會入五行傳謹勿流傳取剝削

鷄禍詩

君不見西漢初永光年當時鷄變禍連延冠距名將尊
已成坐令戚里傾中天那知千五百年後咸淳之歲為
續絃黑鷄兩翅生五距食輒傷人萬口傳家鷄盡縛向
市賣美味不敢登盤筵皆云黑鷄乃癸酉十二相屬符

昭然生不於他獨於翅蓋言羽翼爪距全我欲攀龍報
天公無路可到明光宮安得尸鄉祝鷄翁為我用術禳
其凶天子九九八十一萬歲免使真人白水還飛龍

冬大雷電

方冬十月天災蒸雷公吼怒聲憑憑投壺玉女忽大笑
晦明倏爍來相乘天方收聲地藏蟄激怒豈為陰所陵
圓蒼寓意端有在要使強臣生戰兢強臣聞之但一笑
小兒怖我終何能白鷄巨浸九齡亞青鼠妖星千道稜

我猶視爾為戲劇此雷何帝蟲豸覺聖君小變亦知懼
姦臣大異那能懲寄語天公停此小伎倆只須一聲霹
靂王茂宏

孤憤吟四十韻

原註效子
美對屬體

岷峨老人白頭哭宇宙頻年生意感自從解綬遠遁逃
日望君王戒危辱幡然盡改亂亡事斬新為輯和平福
叢祠獵去嗥夜狐遠嶽收取鳴陽族閔籍惟供永巷婦
竇梁總向高閣束上方月進絕前蹊汙吏日攘行顯僂

賦租時為率土蠲恩澤尤當近畿足聖心悔禍誠勇猛

天命何憂難近續老人靜中指眼看時事轉覺令心寒

旄頭妖彗久不出黔首剜肉殊未完炎然凶渠氣脉壯

莆發姦黨根株盤小臣乘間肆邪論

原註陳伯玉

衆正盈庭

徒坐觀北衙無人素為地南徼何路能通天

原註伯玉時謫

首

血淋漓誰困鄧頭子勾追空憶韓儀舜鳴周九苞鳳溢

序盈庭五彩鸞若為千載遭聖代不肯一咲驚朝端得

非盡善遇堯舜毋庸賣直同箕子我聞屋漏知在下君

欲箸籌煩暫借尺籍無糧創市田告身易醉空酬價膏
腴已被公家奪硤瘠復遭姦佃嚇積庾如京寧復得贏
觔盈溝誰為嘅虫尤兵革自久遠新莽王田徒擾害哀
鴻慘淡集中澤饑虎咆哮行曠野柯山一闕猶未平苔
水三貪尤可怕罔民白撰肯蠲除括稅紅由恣姑嘍城
門口嗅嚴酒摧民屋寸量甚間架瘠人封已信可誅剥
下媚上當何如崔烈為公近日有劉毅答詔今時無
原註
毅言西園貴爵事民間已食烏昧草原註事天上猶積瓊林儲
出長編

小人長國但牟利大學生財誰讀書民貧盜起已有兆
內教外寧猶貢諛紛紛諂子諒無責挺挺諸賢何不圖
芳草為蕭晚節壞嘉橘成枳中年渝虞庭盛際枉者直
周室衰時哲亦愚漳濱病叟愁誰語杜曲詩翁恍如晤
最憐稷契許身愚豈謂陰何用心苦每篇必寓憂世懷
直筆寧愁當國忤法律森嚴信殊絕對屬始終無齟齬
嗟予衰老才力弱稽首名賢晨夕慕憂來援筆偶成章
力戒負囊母輒露

送庸齋赴召

宗臣一去今三年玉堂詔許還坡仙黨魁久屈再徵用
識與不識皆歡顏先生出處固有道諸公進說徒啾喧
或云時事正孔棘百萬生靈皆倒懸公卿唯阿固權位
閹戚盤互拏金錢三垂戚戚迫軍壘萬口嗷嗷愁實田
南交伺釁謀幹腹東海遺患方聚船奈何揖遜救焚溺
同姓體國寧其然或云大老世模楷晚節要同金石堅
不聞鳴犢反潛聖况復白駒遺衆賢濟川必待衆徒揖

傾否亦資茅茹如連試看醉翁門下士當今誰者居清聯
角巾支杖亟還里覽輝翔集毋輕前我當靜慮為折衷
咄此二議何其偏卦爻時義各有當聖賢出處無非天
五真應二泰可致四不求初九豈亨要知君相誠與否
卓識諒已窮幾先苟能舉國聽夫子雖不俟駕何尤焉
巖風吹衣落閩土幸與盟主相周旋酒邊抵掌談世事
愛君憂國固拳拳鴻飛遵渚望不及中夜起坐徒煩煎
心乎愛矣思有助斐然狂簡成茲篇

原註庸齋
後辭不赴

閒中讀書次第

紫陽禮編甫盡卷亟償通典平生願增損溫公鑑目成

原註通鑑目錄有詳有畧

要把二巖書貫穿

原註巽巖長編終微宗秀嵩要錄惟高宗一朝

欲合

為一夜燈覽徹六一文眉山鉅集思重見七書卷帙二

千餘加我三年當閱徧爾來兩目漸眇昏一一手鈔寧
敢倦固知衰頽力不勝其奈嗜好頑難變又恐貪多或
溺心閉閣時燒香一篆

園中讀書

南樓幽簾雖粗適猶嫌塵務妨閒逸讀書老圃四無人
啼鳥落花春寂寂試垂修綆汲義泉更把長鑱斲玄窟
已無俗物敗人意猶有睡魔入吾室且須時擎看山脈
不妨暫著穿花屐君平身世兩相棄韓子老大百無益
但願殘生更幾年了我床頭二三策

恥堂存稿卷七

欽定四庫全書

恥堂存稿卷八

宋 高斯得 撰

五言律

次韻養源避暑西湖

牆擁千竿竹簾紫一穗香避喧情散朗懷舊意悲涼小
簾琉璃色新醅琥珀光夢回聞剝啄渾欲懶衣裳

次韻戴石屏見寄

霞嶠詩人窟夫君獨擅場太羹無厚味嘉稷有真香投

老安蓬戶平生似草堂

原註戴詩
頗近子美

遙知道機熟尊酒百

憂忘

晚秋

颯颯晨飈凜蕭蕭暝色淒拒霜城上下衰柳岸東西老
去慵青簡憂來俯碧溪饑烏誰教汝故作傍人啼

江夫人挽詩

悲哉金氏誌未讀涕先零祖統他宗嗣娶憂再世丁天

殄人一念姑與婦三齡

原註夫人之姑張氏九十
而終夫人九十三而終

幸有

孫枝秀翹然蔭戶庭

病起二首

老去增書癖還遭病見磨杜詩能止瘡周易解祛魔不
得青編伴惟應白日過坐多膚欲痺時起眺清波

頰面驚權出梳頭感髮稀鶴饑從自瘦驥老更求肥蕭
索盤中饌寬長身上衣惟餘酒未減興至羽觴飛

鶴林吳尚書挽詩二首

珠緯躔奎後坤文世載英奇才冠元祐大手擅端平時

事雖難並詞華略與京自從雙鳥寂禁柳謾嚶鳴
魁孽奸時論詞臣格詔除承明俄罷直光範肯馳書東
土淹靈運南州哭仲舒平生丞弼望只此閔高墟

吳叅政淵挽詩三首

造化千年秀皇家數世仁功名光慶祐人物輩乾淳
肇旂常紀睽睽鼎鼎新慈留天不許國步痛斯頻
中外踰三紀勤勞備百為韓公飽經濟杜杞困驅馳風
靜千屯覆春回數路饑江淮與襄漢何地不豐碑

念昔先君子慈恩託下陳
松孤雖願識李御竟無因
賞遇肝腸照書題骨肉親
數行知己淚西望幾沾巾

題林屋洞天

將返鳩夷棹聊觀古洞天
蒼崖還谷口圓嶠結湖壖
大藥慚無質還丹莫浪傳
具區如弱水重到定何年

陳樞密

宗禮

挽詩二首

讀公淳寶疏風節一何奇
凜凜戮丁刃堂堂伐鄭師
良醫渠不使傾履故難支
不見陳攻蔡當年亦右司

原註謂陳

瑩中宗禮去
國亦右司

直道終難恃平生一險夷
蠻谿憔悴日公府笑談時來
識魯山面空看有道碑
雉膏殊未食付與寧馨兒

書事四首

晨炊出避難中夜尚傷弓
赤地眠枯桔青天入短蓬可
憐窮白叟所至聚黃童
老耳雖多曠時聞話相公
坎凜乾坤志蒼茫宇宙身
十年猶鍛翮尺澤豈遊鱗
汗簡時鑽蠹斯文企獲麟
但憂來日少滄海濶無津

不必繙金匱何須校石渠科條唐代典刀尺漢人書

原註

予修通典之外有漢刀尺論西漢得失論二十四卷兵火失之

後世應知我時人莫起

予祈天無厚望更予十齡餘

兩月竄荆棘愁生祇自憐屈盤茅屋底擎蹠野人前盡
室踰百指看囊無一錢長安望不見何日靜戈鋌

耽書

年來得竒疾彷彿似書淫二史番休讀

原註史記漢書周而復始

三

詩夢覺吟

原註李杜詩枕間更誦

少時輕寸晷老去惜分陰只恐

前生是蓬山閣上蟬

端午小飲分韻得身字

此節知何節悲歡發興新懷沙弔沉塚高戶慶長身豪
氣今安在忠魂死不泯詠餘增感慨命酒慰沾巾

立春日集杜句

春日垂霜鬢江村亂水中偷生長避地愁坐正書空乞
米煩佳客應門試小童布衾冷如鐵長夜豈堪終

早行石上水泥凜苦相牽兵甲浮生困艱辛衆目憐囊

空罄金錯米盡折花鈿更有傷心處君臣半壁天

五言長律

存齋年端明挽詩

碩德千人表高風一世欽師承文靖正識拔秀巖深與
學方前古雄文獨擅今史筵新發軔儒館力抽簪蕭艾
俄當路蘅蘭曼出林螭頭恩烏奕豹尾步嶽峯斯脛思
金玉圍腰肯待金綬甘辭若若戟喜對森森孽火遭千

劫讒波沸百壬然臍機穿巧

原註董宋臣

拔眼計謀陰

原註丁大

全誣詆淵衷監成蠲寵命臨一麾猶偃蹇三節又侵尋
聽履星辰近司綸雨露湛世方期汲直人已感遲任披
腹平生節攀髯晚歲心幅巾朝第就遺服暮庭歛書殿
榮封塚玄臺閔在岑鶴山初共被苔水晚同襟感舊鬚
成雪懷人涕作霖元成負文采端可嗣徽音

鄒樞密

應龍挽詩

有偉倫魁彥風標九牧傾直聲同日揭峻節與霜明賀
旅羞權隸佳兵折敵萌一麾人共惜再入道彌貞專對

思尊主塗歸首正名終然踈汲黯誰復挽陽城訪落當

元祀千旄並兩英

原註慶元元年與真西山魏鶴山同召

馬車方稅鞅局

面已翻枰不憚箋天苦堅留出畫行一言嬰虎怒八載

與鷗盟

原註鶴山補外上疏留行并得罪

改瑟新元化持樞贊國成咎

言方汹涌悟主獨和平南谷撩歸夢東藩薄宦情寒花

馨晚節潛穎謝浮榮落落靈光殿堂堂董相坐國人歌

輟杵志士淚緣纓隸也常尊孟嗟哉未識荆易名如得

與猶足慰平生

讀天台侍郎黃公宜神道碑

昔纂寧宗紀名臣嘆寂寥鉅姦方枘國多士謾盈朝快
讀黃公傳如聞舜代韶盡言醒衆瞶獨立聳清標辨枉
全張猛持身簡豎刁要途方凜凜歸夢已搖搖疏廣還
家勇義之入海遙寒花矜晚節老檜傲霜朝遷史雖猶
缺邕碑亦孔昭咨予無健筆魂去若為招

奏院豫七弟挽詩

瑟瓚天資美洪樞地胄華安恬羞善宦孝謹克承家猶

學耽奇古文房好靜嘉顏瓢空不繼原粟散無涯庭徑
長生草山園妙識花公門捐造請內典却紛拏留邸空
陳迹分麾付一嗟

原註屢得
郡皆不赴

階蘭芳欲盡池草白誰誇

甚欲號森栢其如歎繫瓜遙將萬行淚灑向夕陽斜

挽亡弟豫九制參詩

山園有佳樹生處本同枝客土何年異孤根兩處移西
栽種嶺下東植雪溪湄君壯方逢世吾衰久忤時丘園
甘寂寞門戶倚扶持乘障能名著參籌婉畫奇平生境

雖順末路數終奇屢厄梟鳴暴仍遭馬蹏危

原註馬光祖觀望拒

其八

客魂翔寓里旅櫬出京師鴈澤羈孤影鷁原躑躅

悲殫予暮光景恤汝衆孤嫠臨穴萬行淚九原知不知

七言律

谿亭春日二首

嚶嚶春弄沸青郊老鶴脩然獨在臯澹池和風眠五柳
冲融暖日醉三桃盡輸樂事歸妍唱肯把牢愁寄續騷
想得舊遊時入夢西堂春草未應薶

豈不懷歸蜀道難故來谿上稅浮驂新詩功次日遷九
潛聖儀刑畫接三牕竹有情陪素隱園花無賴恣紅酣
要將雲淡風輕句參請宗門老晦菴

送胡吏部穎赴闕

粉榆陰裏植甘棠民坐春風吏履霜治粟久持膚使節
握蘭歸噴望郎香去思應共湘江永來諭誰云周道長
拖玉腰金君不羨令名嫖節看流芳

郎省分携恰五暮相逢一笑楚江碕釣魚山下人方到

回鴈峰頭客已歸夜雨未厭揮塵柄春風無奈趣鞍轡
臨岐但祝加餐飯人物如今角宿稀

建寧府鹿鳴宴詩

鶴書夜下建谿南拔盡鄉英萬口談帝闕佇聽臚唱九
賓筵試詠鹿鳴三身名雖待文章顯氣質須從道義涵
海內如今人物眇掀天事業要奇男

題張志山留稿

一眼高懸四海空評詩誰出杜陵翁紫鸞翠駁真難並

翡翠鯨魚定孰雄
門外飛來清婉句
壇中報起寂寥風
錦囊已逐春風去
何日花前一醉同

勸農有感三首

井卦分明說勞農
周人田制寓其中
但令此念純無已
可使吾民養不窮
數豆荒餐延野老
一篇腐語誨村童
爾忱不屬知何補
謾道天公靳屢豐

三代興屯法已精
田官衆建日諄勤
一年一度情何簡
于縣于州責孰分
愛禮存羊斯僅可
賣刀買犢匪攸聞

周官千載何曾試我欲重拈靜楚氛

衍漾春郊徧野疇不堪回首劔南州
勸農官吏渾冠鶚力穡丁夫總帶牛
苦欲如邛嗟未得自憐適越竟何求
春風萬斛濃於酒一與畸人盪許愁

次韻趙庸齋賀除閩漕

方向江湖拜散人天王明聖尚哀臣
牽舟未得還三峽乘傳何堪使七閩
作牧幸逢青眼舊論交寧歎白頭新
却愁未稅周原鞅公已催歸上要津

庸齋再賦予亦再和

苔濱衰白一羈人五玷皇華遣使臣
已自無恩及南楚那能有福散東閩
預憂刺史聲名減不稱君侯佳句新
踏偏山川成底事徒令沮溺笑知津

次韻養源雙溪閣野眺

雨餘久不眺寒城平楚遙知一望清
老杜頗慵看白谷大王惟愛寫黃庭
剪裁花柳春刀尺錯綜江山帝緯經
終待幅巾同遠望逃他天械與天刑

送不浮赴沿江制參二首

地褊難須虎竹分不妨六度作參卿
九江日落回君首三樹風吹動我情
此別不堪分袂苦何時重聽對床聲
到官休道無來使湓浦雙魚自可烹

餅中儲粟苦無多百口張頤劇雁鵝
王粲依劉寧得已嚴公待甫定如何
且須省却癡兒事只好長為醉後歌
瓜熟歸來再相聚阿兄猶自種陽坡

次韻上饒溫淳投贈

從來箕斗只虛名，石火光中了一生。
寂寞九京薶子政，荒涼三徑老淵明。
我方遜世人爭棄，君獨憂時意未平。
多謝相逢便如故，次山詞氣浩縱橫。

原註來詩
憶趙庸齋

送饒漕

已催四牡使駢歸，江漢旋歌命召詩。
借問儀庭集鸞鳳，何如當道卧熊羆。
柳迎士行成陰密，樓得元規發興奇。
少待邊亭永清晏，却歸簪筆侍龍墀。

次韻戴石屏見簡二首

採玉探珠遍九圍先容分不到離奇委心自信天行止
用世定慙道覺知且可謾持東海釣終期不負北山移
杜陵雖老心猶壯盍與同尋蜀相祠

入東頗亦交名勝安道聞孫更崛竒明月清風能我共
高山流水只君知遙憐把酒懷人處正是登樓望遠時
安得抽簪投海岸相從朗誦快心詩

原註戴有快
心詩數十章

送史深之入蜀

我讀江湖夜雨編西風搔首一淒然如何經濟二三策

僅見琳琅千萬篇
小隱安能老丹嶠
壯懷猶欲上青天
此行若與涪翁遇
定把詩家古印傳

次韻施秀才新樓有賦

白鶴山中熊豹姿
可憐營窟傍苔溪
無家那得還三蜀
寄跡堪嗤傳一齊
共詫閭能捫斗柄
誰知堂不愛猿題
厦成人已辭騷國
何日同登醉似泥

飲牡丹

尚記年時醉我賓
抽簪起舞坐生春
誰呼七七逡巡手

重現三三夢幻身獨樂園中老居士沉香亭北謫仙人
吾今望此如蜂蟻莫恠名花向我顰

夜坐有感

自嘆吾生行且休誰能長抱畏塗憂三番自取剗腸害
百鍊多成繞指柔鞭鳳咎鸞勞夢想鬪雞走狗好沉浮
從今投劾歸漁隱手掬清波蕩許愁

次韻趙庸齋見寄

人在南山第幾重采薇端可繼高蹤褰衣辟世鋤三徑

閉戶求仁印五峰周室如何廢常棣楚人猶聽集夫容
大書元祐黨魁傳今代豈無人姓龔

鄧侍郎再和予亦再荅

烟雨淒迷主簿峰傷心蕙帳十年空夢魂吳蜀千山隔
歸路湘江一水通莊舄相省均是客虞卿何事獨嗟窮
天涯邂逅誠多幸許挈詩囊入社中

春日偶成

七年高卧雲溪濱閱盡諸公上要津共恠朝無書一字

寧知項有鐵千觔淵明肯仕義熙世劉老要完元祐人
四壁新堂基已就從今飽挹洞庭春

七言絕句

蜀錦亭

故國名花負不同景陽機裡織春風莫將麗質驚丹卉
只把孤根託化工

孤憤吟十三首

原註甲戌十一月以後邊事
日急作此以紀一時之事

檜侂當權十五年始終只被一私纏人心失盡天心怒

燎火炎炎故不然

原註前漢成紀叙傳
炎炎燎火亦元不燭

金繒私許北方盟君父前頭却隱情今日禍胎從此始
罪浮孽檜與權京

先帝方歸盛德園龍輜半夜浙江邊孤臣泣血無他請
願把姦臣訴九天

軍功閭束萬人多兵部門前雀可羅悍將武夫心失盡
可知棄甲與投戈

國家元氣是人材稍露光芒盡力推今日舉朝皆婦女

邦衡此語亦誠哉

掃除學法暗諸生精銳銷磨直可坑乞斬三姦亦人爾
汝曹何忍負齋黌

無罪無辜竄逐人幾經大需不霑恩更將改正張羅網
結盡千千萬萬冤

彊買民田自噬膚大家破盡為催租幾多怨氣冲霄漢
天欲無誅可得乎

督帳行趨建業東壯哉迎敵氣如虹勸君猛拾一腔血

莫學檀公誤乃翁

乘桴願浩元無策進蹕豐公妙達權寧死老身終不去
太皇此語可回天

覆按山凌挈累行金多季子索齋輕殿中御史尤堪戮

盡室逃歸駭一城

原註文及
翁陳過

囊封癸酉罄愚憊第一親征次守江啼得血流無用處
自憐弱步要豐扛

阜錄新書幸已成名山藏去復傳人母令十載編摩苦

金匱石室書
卷八
竟與家書共厄秦

聞楊元極去國

傾厦難將一木支
微垣累疏亦何為
鳳凰本自翔千仞
不待區區奪我池

題愛梅亭

生世梅花是故知
相逢不負歲寒期
自從一點梢頭白
看到青陰弄實時

題同濂閣

霽月光風灑落人與君同調故憐君不須嘆息知音少
後世豈無揚子雲

樂語

台州宴色知府樂語

銅竹分符霞嶠欣逢於召芡金蘭締好星屏幸踵於蕭
規聯翩振鷺之偕來先後滌龜之孔通宜開華宴用慶
康侯恭惟某官麻嶺名流象山法嗣絕人問學漢侍中
家法猶存經世才猷也孝肅風聲故在屢起南涯而佐

幕亟登西序以影纓弄月台巖分風帝里已富外庸之
馭歷合躋中禁之班聯顧方涉筆於麟宗使屈凝香於
燕寢蓋在庭莫不舉遂而弄印無以易堯致煩劉夢得
之重來為繼孫興公之高詠暫對五峯雙闕行膺一札
十行自太守數歲而三公此吾州近年之故事某官偶
因易地初起佐州已忻密接於英塵更獲親陪於坐嘯
千里江山如有喜一番守相總更新試心事之共論慰
邦人之僉囑金壺緩箭翠管鳴筵今宵瓊玉樓邊莫惜

清樽共醉來歲絲綸閣下好將佳話重拈某等濫綴伶
工獲趨台祀敢陳韻語上佐歡悰

使君五馬日邊來猶是當年逸驥才漢竹光榮知妙簡
召棠蔽芾喜重栽試聽孝肅傳新令竚看文清拜首台
盛事難逢須爛醉樓頭玉漏莫相催

宴建寧知府趙尚書樂語

原註時為
福建漕

北門學士久鎮藩維西塞山人新乘使傳共處建安之
都會均為元祐之黨人宜秩華筵以旌盛事恭惟某官

司馬九分來地位歐陽數百載天人鐵脊擎空善類倚
為合脉丹心貫日天子識其精忠拳拳八士之薦揚凜
凜百壬之排斥使得居周公之位有大設施則回視更
生之流一何溟滓塗歸不遂勇退無難老龍方卧於洛
波五馬催臨於建水受廬百萬再生魚腹之餘負笈三
千聳聽虎皮之講共惜漢宗臣之久去行催周大老之
來歸某本踐歸田還來問俗尚記希文之去國曾陪師
魯之留行及逢李稷之登車又際潞公之出鎮志同方

而道同術聲相應而氣相求今宵一笑交歡此會百年
幾見黃花晚節相期不改於真香青竹芳名庶可共傳
於他日某等載陳諧語以洽好盟

本意苔溪老釣蓬乘輅來訪玉仙翁並遊元自從迂叟
將漕何妨拜潞公宿世神交雙劍合平生心事一樽同
乾坤整頓須公等夜掣鈴條紫禁風

建寧府宴徐意一知院樂語


原註時
權建守

元臣就第共欽爵齒德之尊三小國會公敢獻伯子男

之禮六要舉綠野堂之盛事須煩紫霞洲之主人乃卜
芳辰肆開華宴恭惟某官地位臯夔稷契聲名杜富范
韓重朝廷如周廟之黃鐘主公道若漢軍之赤幟七年
政地一念君天渭相擅朝最憚沂公之正直荆人相國
深嫌清獻之剛方進力爭於凝旒負宸之前退顯斥於
合席同堂之際豈不知以身察察將射影之難逃獨奈何
執我仇仇欲褰裳而不可殆蕭蘭之並植終玉石之俱
焚陸贄延齡功何難辨韓非老子傳豈雷同投簪與赤

松子以並遊舉盃對武夷君而無愧故鄉畫錦不妨暫
樂於閒身聖主宵衣竚見亟還於大老某偶來駕牡曾
是登龍耳傾英袞之相周目駭深衣之還洛雖則為國
家而甚惜却欣觀道德以親承屬暫管於銅符爰亟張
於綺席丹山碧水佳氣方新白酒黃花蕭辰已近試展
醉翁之懷抱庶觀退傅之風流今日午橋喜勝遊之得
與他年東閣好佳話之重拈上佐歡悰可無韻語
幅巾支杖勇還鄉昨夜方開畫錦堂司馬高風傾國慕

韓公晚節襲人香已忻綠野脩初服好為丹山酌一觴
卜夜莫嫌秋漏永仙翁鶴骨儘康強



恥堂存稿卷八